

光緒江西通志

江西通志卷一百五十二

列傳十九

撫州府二

元

吳澄字幼清崇仁人所居當華蓋臨川二山閒望氣者
徐覺言其地當出異人澄生五歲日誦千餘言夜讀書
至旦母憂其過勤節膏火不多與候母寢然火復誦習
既長於經傳皆習通之知用力聖賢之學嘗舉進士不
中樂安鄭松招澄居布水谷乃著孝經章句校定易書
詩春秋儀禮及大小戴記程鉅夫奉詔求賢江南起澄
至京師未幾以母老辭歸行省掾元明善以文學自負
嘗問澄易書詩春秋奧義嘆曰與吳先生言如探淵海
遂執弟子禮擢應奉翰林文字有司敦勸久之乃至而

代者已到官澄卽日南歸未幾除江西儒學副提舉居三月以疾去官召爲國子監丞升司業嘗爲學者言朱子於道問學之功居多而陸子靜以尊德性爲主問學不本於德性則其弊必偏於言語訓釋之末故學必以德性爲本庶幾得之議者遂以澄爲陸氏之學英宗卽位遷翰林學士泰定元年初開經筵首命澄與國子祭酒鄧文原爲講官會修英宗實錄命總其事居數月實錄成未上卽移疾不出中書左丞許思敬奉旨賜宴國史院乃致朝廷勉留之意宴罷卽出城登舟去中書聞之遣官驛追不及而還詔加資善大夫澄身若不勝衣正坐拱手氣融神適答問亹亹使人渙若冰釋早以斯文自任故出登朝著退居於家與郡邑之所經山士大

夫皆迎請執業而四方之士不憚數千里躡屨負笈來
學山中者嘗不下千數百人少暇卽著書於易書春秋
禮記各有纂言作學基學統二篇使人知學之本與爲
學之序尤有得於邵子之學校定皇極經世書又校正
老子莊子太元經樂律及八陣圖郭璞葬書初澄所居
草屋數間程鉅夫題曰草廬故學者稱之爲草廬先生
天厯三年朝廷以澄耆老特命次子京爲撫州教授以
便奉養明年六月得疾有大星墜其舍東北卒年八十
五封臨川郡公諡文正孫當自有傳阮

劉夢生字季說樂安人幼孤母督其學十歲偶觀弈長
者晒之遂閉戶力學元初亂甫定好收藏古書手自鈔
補歲饑竭廩贍賑雖空匱不悔

吳文正集

徐通字泰甫樂安人性篤孝宋時邑令胡世則趙與榕俱厚禮之與榕遷欲攜至帥府以親老懇辭文天祥欲用之亦辭至元中總管劉懷遠以邑大燬檄通攝尉事通欣然領之安輯流移收瘞齕骼郡守錄其勞績通謝去或問故曰本從吾邑起見非爲功名地也吳澄時造其廬

安志

李榮臨川人至元初爲行軍令史宜黃南坑盜起調兵捕治議畫地以兵殲之榮抗議不可時內附未久守吏率欲以威服眾軍中又利其子女金帛計皆出此間榮言變色主兵怒引弓射之榮曰殺我以活萬命可也兵官愧悟納矢服中曰今當何如榮曰盜烏合不能持久若良民豈不知逃死按兵勿動以誠意諭之盜成禽矣

主兵者從之獲盜首四人餘散去鄉民遂安

人物志

涂立可字允瑞宜黃人自曾祖以下三世皆宋貢士立可孝友恭讓一兄一弟早逝撫其孤教育冠婚之與已子無異士大夫往來南北者以獲交爲榮築亭江皋俯臨遐眺扁曰小瀟湘又別營庵於先墓側題曰于斯後

改曰塗山庵

吳草廬集

孟君用字和卿臨川人至元閒兵掠臨川君用生甫三歲母章氏負以逃亂兵及之章哀號請死以存子甫置子於地身卽被驅不得顧兵旣過孟氏得君用歸養之竟不知母所往稍長聞其事遂習蒙古言語文字將極北方求之十年不得還至臨川客有知母所在者君用往求則母已歿號慟墓下得其遺衣以還葬焉虞集爲

之立傳

林志

曾詠字師黠樂安人至元間母因避地得疾昇歸值元兵至悍卒誣諸不賂己者爲盜詠謀徙母深山中母不從詠佯爲呻吟若與母同病者獲免時覈民田詠主其事履畝肥瘠高下無錙銖私何太虛爲立傳

林志

曾沖子字聖和淵子弟至元中程鉅夫奉詔求賢以沖子應授福建提刑司僉事時閩部遠且險吏乘爲奸民迫爲亂沖子行部警諭感切民畏而懷之以奉議大夫致仕

人物志

吳可孫字聖可金谿人宋咸淳進士授新昌尉用程鉅夫薦任建昌路教授秩滿歸餘粟千石有奇悉封識以待來者

人物志

婁起莘臨川人兄南良宋咸淳謝志熙戊辰進士次文輔

元程鉅夫薦爲石鼓書院山長起莘力學有隱德揭傒

斯作詩述其救盲女事子志瀄亦用鉅夫薦任南岳書

院山長吳澄稱臨川家世首推婁氏

人物志

詹崇樸字叔厚樂安人經義貫融宋末舉進士不第大

德中夏友蘭建鰲溪書院吳澄請崇樸主其教學者多

所成就所著有厚齋奎光集

林志

虞集字伯生宋丞相允文五世孫父沒黃岡尉宋亡僑

居臨川崇仁集生三歲卽知讀書仁宗朝以薦授翰林

待制兼國史院編修嘗嘆曰儒者皆用矣惟虞伯生未

顯擢耳英宗卽位拜翰林學士兼祭酒卽除奎章閣學

士纂修經世大典中丞趙安世爲請外任帝怒曰一虞

伯生汝輩不容邪龔伯璉以才俊爲馬祖常所善亟稱之欲集爲薦引集不可文宗崩謝病歸伯璉後以事敗世乃服其知人元統二年遣使召還疾不能行卒年七十七早歲與弟槃同闢書室左室書陶淵明詩題曰陶庵右室書邵堯夫詩題曰邵庵故世稱邵庵先生

元史白

志舊案集證文靖所著有道園學古集

虞槃字仲常集之弟延祐進士授吉安永豐丞除湘鄉州判官有巫至其州稱神降告其人曰某方火卽火又曰明日某方火民以火告者槃皆赴救至達晝夜告者數十寢食盡廢縣長吏以下皆迎巫至家厚禮之又曰將有大水且兵至州大家皆盡室逃槃得救火卒一人訕之盡得巫黨所爲坐捕盜司召巫至鞠之無敢施鞭

箠者槃謂卒曰此將爲大亂安有神乎急治之盡得黨與數十人羅絡內外果將爲變者斷巫并其黨如法吏民始服秩滿除嘉魚縣尹槃已卒槃幼時嘗讀柳子厚非國語以爲國語誠可非而柳子之說亦非也若非非國語時人已歎其有識詩書春秋皆有論著而春秋乃其家學故尤善讀吳澄所解諸經義輒得其旨趣所在

澄亟稱之

元史

何中字太虛樂安人少穎拔以古學自任家有藏書萬卷手自校讎廣平程鉅夫清河元明善柳城姚燧東平王構同郡吳澄揭傒斯皆推服之至順二年江西行省平章全岳柱聘爲龍興郡學師明年六月以疾卒著有易類象二卷書傳補遺十卷通鑑綱目測海三卷知非

堂稟十七卷

元史

孫轍字履常其先自金陵徙家臨川轍幼孤母蔡氏教之知警策自樹立比長學行純篤家居教授考德問業者日盛與人言一以孝弟忠信爲本辭溫氣和聞者莫不感悟待親戚鄉里禮意周洽未嘗及人過失士子至郡者必來見部使者長吏以下仁且賢者必造焉轍樂易莊敬接之以禮言不及官府憲司屢辟皆不就江西行省特以遺逸舉轍一人轍善爲文章吳澄嘗序其集曰所謂仁義之人其言藹如也其見稱許如此年七十有三卒於家

元史

饒宗魯字心道臨川人性孝友生五歲母歿事繼母孝養備至隱居不仕天歷二年大旱鄉人乏食死者相藉

發廩賑之所活甚眾所著有易傳庸言等集

林志

夏友蘭字幼安樂安人事母以孝謹聞從吳澄學大德中建隆溪書院捐田五百畝以贍學者行省薦於朝三

觀仁宗於潛邸賜書院額授會昌州同知辭

人物志

吳定翁字仲谷臨川人從曾平山學又學詩於甘泳之

吳澄揭傒斯皆亟推之薦辟不起年幾九十卒

林志

葉宋英臨川人天性妙悟嘗云黃鍾九寸之管無定論隨所置律而上下損益以爲聲均存而律可辨矣自製

譜曲均間合節趙孟頫虞集亟稱之欲引入禁林議樂

律而宋英已卒取所著曲譜及樂律遺書上之

人物志

王方貴字顯初樂安人授東湖書院山長遷江陽縣尹除厚葬之俗獲收窆者千計遷韶州路經歷郡有萬戶

豪橫繩以法母老乞歸終養韶人立祠祀之著有雲萍

豪

人物志

周昂霄字翀之崇仁人至元間充濂溪書院山長工於

聲律吳澄嘉其行檢端嚴爲作棲筠集序同邑有周陽

鳳字伯清博學能文士多從遊者有山堂文集

人物志

袁明善字誠夫臨川人師事吳澄晚年教授於虞集之

門自號樓山所著有征賦定考援引經傳言井田水利

之法甚備經世之書也

道園學古集

黃極字建可樂安人師事吳澄元統中南臺薦以不求

聞達不起所著有西齋集子寶字仲瑤淹洽經史與何

淑張潔王翊稱樂安四傑

人物志

涂潛生字自昭宜黃人邃於易學時行省鄉試額取二

十三人潛生三舉上春官授贛州濂溪書院山長所著

有四書斷疑易義矜式等嘗行於世

人物志

黃昭樂安人登進士歷官兵部尙書至正乙未奉詔偕江西行省參政火你赤廉訪使吳當專任招捕聽便宜行事既佐當平定撫建郡參政朵歹忌其功謂南人不

宜掌兵遂以昭守臨江已又譖其難任牧守坐除名江

西遂失守

杜志

吳當字伯尙澄之孫也幼承祖訓以穎悟篤實稱長精通經史百家言侍其祖至京補國子生澄既捐館四方學子從澄遊者悉就當卒業焉至正五年以父文蔭授萬億四庫照磨未上用薦改國子助教會詔修遼金宋三史當預編纂書成除翰林修撰累遷至翰林直學士

時江南兵起特授江西肅政廉訪使偕江西行省參政和尼齊兵部尙書黃昭招捕江西諸郡便宜行事當以朝廷兵力不給旣受命至江南卽召募民兵由淞入閩至江西境建昌界招安新城孫塔禽殄李三道路旣通乃進攻南豐渠兇鄭天瑞遁鄭原自刎死十六年調檢校章迪率本部兵與黃昭夾攻撫州勦殺首寇胡志學進兵復崇仁宜黃於是建撫兩郡悉定是時參知政事托迪總兵撫建積年無功因忌當屢捷功在己上又以爲南人不宜總兵構爲蜚語謂當與黃昭皆與寇通有旨解二人兵柄除當撫州路總管昭臨江路總管尋有旨罷總管除名已而知其誣詔拜當江西行省參知政事命未下而陳友諒已陷江西諸郡和尼齊棄城遁當

乃戴黃冠著道士服杜門不出友諒遣人辟之拘留一
年終不爲屈遂隱居廬陵吉水之谷坪卒年六十五著

有周禮纂言及學言彙元

章迪字允德臨川人能文章有才略吳當奉詔捕江西
盜辟迪爲行省檢校時劇寇胡志學據撫州民不勝其
酷迪率兵討之志學戰敗伏誅一郡遂定左丞和尼齊

原作火
你赤

忌其功召還省殺迪帳下冤之

林志

王孚遠字允德樂安人至正間揭傒斯薦授大同路學
正壬辰兵亂傾家舉義糾集丁壯萬餘人夾柵樹寨保
障鄉邑官兵勦賊孚遠出糗餉軍營獻策萬言條陳機
宜十事和尼齊忌而殺之

人物志

朱夏字元會金谿人早遊吳澄門杜門究心經史澄稱

其爲文不及於古不止濟南張起巖在江南行臺辟憲司掾京兆賀某在相位薦入史館皆未就至正中鄉寇起竟罹其禍所著有鳴陽集

林志

黃德字養德樂安人少穎敏於書無所不讀邃於天文嘗論日月無左旋謂先儒蓋以理談理未嘗以象觀理故其言如此吳澄評樂安人物謂何黃齊名指太虛也

號同谷有文集

林志

張恆臨川人橫渠裔孫自橫渠六世孫日中居南城從文天祥起兵爲李恆所殺日中子惠避地臨川上官里元泰定四年恆任電白千戶與高州瑤寇力戰死里人立忠烈祠合日中祀之瑞州路錄事龔繼善爲作記推本橫渠講學之澤所致云

縣志

黃紹字仲先臨川人博學有操守至正戊子鄉舉尹靖
安縣壬辰兵變戢鄉兵爲守禦計屢挫賊鋒糧盡爲賊
所圍正冠危坐大罵而死

林志

李本字伯宗榮孫從學於吳澄澄歿就學者皆依李氏
本與弟棟講明濂洛之學所居有環翠亭君子堂虞集
皆爲之記棟父李淵嘗三刲股療母疾輒愈郡人以孝

稱之

人物志

李衡字元成崇仁人篤志春秋嘗著集說分二例一爲
稽古設一爲科舉設元末領鄉薦爲太和州學正明洪
武十二年以明經博學徵不就有文集數卷

人物志

萬元喆金谿人弱冠有文聲登進士辟江浙行省掾以
大臣薦爲本縣尹未幾兵亂路梗入福建省憲交辟浮

海北至大都而卒學者陳介搜其遺藁得詩文彙爲十卷元詰博學工文居官以善績稱門人蘇伯衡舉河汾故事私定其謚曰文貞先生

林志

黎仲基名載以字行臨川人性端重嘗謁吳澄於郡學澄喜曰期年所接無如君者數以薦厯官太平路教授斬黃盜起嘗以奇策佐伯顏取勝江上歸築室瓜園明洪武初再薦不起卒有瓜園集十卷

林志

陳介字彥碩遠祖原由汴徙金谿介性篤孝父昇登進士爲和尼齊所殺介痛父非命詣闕懇冤得白時歲當大比介留京師就試登進士授溇州同知治有能辟築隄以捍水災民號陳公隄明洪武初徵之介易姓名爲姚東之以避徵有文集

林志

黃伯遠金谿人少從吳澄學登進士除國子博士元亡

歸隱故山王英嘗作六賢詠謂葛元喆劉傑朱夏陳介

黃暉及伯遠也

林志

周信甫字以成崇仁人謙謹樸實適流寇至其里要索

重賂信甫代貧民贖百餘家築茭陂通水利復與孫德

甫各捐私田鑿溝洫溉官民田地八千餘頃歲收所積

平價活饑民年八十二卒又同時金谿余受樂安邱從

學陳楚傑劉成德俱各以孝義著

志

張紹撫州人學儒術尤明法律仁宗英宗朝命廷臣以

古律合新書撰大元通制頒於天下紹嘗通制未成之

時編錄詔條及議擬通行之例分隸六部題曰大元條

例綱目殫心四十年其書可輔通制而行

吳文正集

張仕謙樂安人知婺源州至正間賊圍城四十餘日城陷妻被執不從受害復加刃張頸以脅降仕謙曰爲國死忠可急殺我至死罵不絕口

府志

黃雲撫州人寓靖安素以勇捷稱至正十二年斬黃賊數萬來寇縣達嚕噶齊綽哈帥眾禦賊以雲爲前鋒自二月至於八月戰屢捷雲每戰獨以身當敵嘗爲數十人所圍輒奮身躍出已而賊黨益盛身中數十槍噴血

罵賊而死

元史忠義綽哈傳

藍光字仲晦臨川人與危素同受業吳澄朵仲謙參江西辟光從事以功厯官福建行省都事因家焉素入明薦光謝病不起家居教授五十餘年以節終年九十九

福建通志

何淑字伯善樂安人至正進士授武岡丞蘄沔盜起不
果上明洪武辛亥召爲太子賓客辭不就六月特召天
下名士九人淑居首固以老疾辭戊辰復遣幣徵先一

月卒

林志

吳儀字明善金谿人博極羣書海內兵起無意仕進遠
近學者爭集其門所釋皆五經大義尤精春秋著三書
曰春秋裨傳曰春秋類編曰五傳論辨多先儒所未發
雖盛暑隆冬必正容端坐學者稱東吳先生子伯宗自

有傳

人物志

劉傑金谿人至正進士歷官延安路總管尋爲中書舍
人改監察御史累升工部尙書集賢院學士致仕制行

甚高

明一統志

黃嘒字殷士金谿人博學明經善屬文尤長於詩左丞相太平奏授淮南行省照磨未行除國子助教遷太常博士轉國子博士升監丞擢翰林待制兼國史院編修官二十八年京城既破嘒歎曰我以儒致身累蒙國恩爲冑子師代言禁林今縱無我幾何面目見天下士乎遂赴井而死年六十一有詩文傳於世

元史

姜碩字公碩樂安人累官禮部員外郎至正庚子奉詔自海道入江楚招陳友諒至邵武遇僞指揮康宗碩諭以朝廷意賊怒碩大罵之被害事聞贈禮部侍郎諡忠烈

劉德銘臨川人至正間兵亂郡守率民倡義推德銘爲首十四年從守臣取金谿授南豐州判官十八年賊破

撫城守臣譚勒哲特穆爾

原作平章完者

兵敗德銘亦歿詔加

旌贈

縣志

饒介字介之臨川人自翰林應奉出僉江淞廉訪司事張氏入吳杜門不出士誠慕其名自往造請承制以爲淮南行省參政介不能脫遂家采蓮涇上日以觴詠爲事張氏敗俘至京師死之姚廣孝稱其爲人倜儻豪放書似懷素詩似李白氣餒光芒逼人志大才疏而無所成爲可惜也介自號華蓋山樵亦曰醉翁著有右丞集

人物志

鄧彥誠金谿人世居雲林之陽元季天下大亂撫州不守彥誠曰吾不可不衛宗人使及於難卽召鄉里少年分隊伍樹砦柵於雲林山金鼓之聲晝夜不絕寇來輒

敗摺紳依以免者百數十家事平會府上其功將爵祿之彥誠謝不受乃於室之西偏築亭曰逍遙其上人皆曰是功成而不居者宜名亭曰清風以勵衰俗云

宋學士集

謹案縣志彥誠名諒槐從孫卒祀忠義祠

吳皋字舜舉臨川人宋丞相潛六世孫早師吳澄得爲學之要文章森嚴有法教授臨江遂占籍焉號平齋有吾吾齋類藁從子均仲擢春坊中允所著有新增復古

編林

志

朱思本臨川人精輿地之學始爲開方計里之法廣輪方位不爽毫釐自後爲輿圖者宗之

縣志

張潛字以修樂安人工詩文元末鄉舉明洪武初以賢良薦不起有敬亭文集

安志

曹孟仁宜黃人至正壬辰之亂弟仲容舉義旗壓孤嶺
深入爲叛民所殺孟仁盡用其產以募士前後破賊無
數涂守約爲立傳

林志

趙均保臨川人至正壬辰之亂撫州幾陷均保與陳德
輝倡義散家財訓丁壯設計防禦時江西郡城皆陷沒

惟撫州境獲全

林志

李弁字宗禮臨川人後徙餘干習泰鄉至正閒項普壽
陷饒州弁與章綸章黼集義兵迎敵當鋒者止九人血

戰大敗敵弁好學治易爲文立就後卒死於戰

林志

鄧烈字季謨金谿人舉進士不第壬辰之亂金谿被害
尤慘鄧氏有思誠者合族人謀曰吾家世忠義豈可爲
賊所制時盜屯縣治思誠焚其砦俄而盜兵四起烈與

族子石力戰而死

林志 謹案金谿縣志元季死義尙有余恩許亮藍彰三人

明

熊鼎字伯穎臨川人元末舉於鄉長龍溪書院寇亂結鄉兵自守陳友諒屢脅之不應鄧愈鎮江西數延見奇其才薦之太祖欲官之以親老辭乃留愈幕府贊軍事吳元年除中書考功博士遷起居注宮殿成詔搜故事可懲鑒戒者書壁間舍人耿忠使廣信還奏邵縣官違法狀帝遣御史廉之而時已殞赦書鼎偕給事中尹正進曰朝廷布大信於四方復以細故煩御史失信且褻威帝默然久之乃不遣洪武改元新設浙江按察使以鼎爲僉事分部台溫台溫自方氏竊據僞官悍將二百人暴橫甚鼎盡遷之江淮閒民始安平陽知州梅鑑坐

賊民數百咸訴無罪鼎釋之甯海民陳德仲支解黎異
異妻屢訴不得直鼎一日覽牒有青蛙立案上鼎曰蛙
非黎異乎果異止勿動蛙果弗動乃逮德仲鞠實立正
其罪山東初定設按察司復以鼎爲僉事奏罷不職有
司數十輩進副使徙晉王府右傅坐累左遷召爲刑部
主事朵兒只班率部落內附改鼎岐甯衛經歷賜白金
寶鈔以行旣至知寇僞降密疏論之帝遣使慰勞賜裘
帽復遣中使趙成召鼎鼎旣行寇果叛脅鼎北還鼎責
以大義罵之遂與成及知事杜寅俱被殺帝聞悼惜命
葬之黃羊川立祠以所食俸資其家

明史

周忠字伯厚金谿人洪武初召見奏對稱旨寵賜優渥
從征湖廣特命參謀左右獻太平十六策後使沙漠不

知所終

分省人物考

危素字太樸金谿人少通五經遊吳澄范梈門元時用大臣薦授經筵檢討修宋遼金三史由國子助教遷翰林編修纂后妃等傳遷太常博士歷官禮部尙書參中書省事拜參知政事出爲嶺北行省左丞言事不報棄官居房山素爲人侃直數有建白上都宮殿火敕重建大安睿思二閣素諫止之請親祀南郊築北郊以斥合祭之失居房山者四年明師將抵燕淮王監國起爲承旨素甫至而師入乃趨所居報恩寺入井寺僧大梓力挽起之曰國史非公莫知公死是死國史也素遂止洪武二年授翰林侍講學士訪以元興亡之故詔撰皇陵碑稱旨坐失朝罷復官兼宏文館學士賜小車免朝謁

時素已七十餘御史王著論素亡國之臣不宜列侍從

謫居和州守余闕廟歲餘卒

明史

張子明安仁人

謝志作東鄉人其時東鄉未立縣也

朱文正守南昌子明

爲輔陳友諒圍城時太祖居建康子明晝伏夜行求救

太祖命速還堅守救兵且至銜命至湖口爲賊所獲衣

以錦衣使招文正降子明佯許之及至城下大言曰賊

命吾誘公降上傳諭堅守兵卽至予不及同斬賊爲恨

賊大駭以稍刺之死友諒敗封侯爵謚忠節祀南昌忠

臣廟子仁杰蔭千戶

府志

吳錫字用庶金谿人明初以薦授國學錄時醴泉出神

樂觀上孝感詩五十韻賜乘傳還鄉著有時雨集肖監

長編

林志

王經字孟遠金谿人松滋陳氏建墨濤義塾聘余真主
教經徒步二千里往傳二戴禮之學元末隱漆谿洪武
初徵拜理官時鋤剗吏弊悉用儒術選經爲隴西令卒
著有金谿縣志禮記纂要唐詩評雜詩文若干卷分省人物
考

吳伯宗名祐以字行金谿人洪武四年廷試第一時開
科之始得伯宗帝甚喜賜冠帶袍笏授禮部員外郎與
修大明日厯胡惟庸用事欲人附已伯宗不爲屈惟庸
銜之謫居鳳陽伯宗上書論時政因言惟庸專恣不法
辭甚愷切帝得奏召還賜衣鈔奉使安南稱旨除國子
助教改翰林典籍帝製十題命賦援筆立就詞旨雅潔
賜織金錦衣除太常寺丞辭改國子司業又辭忤旨貶

金

謝志誤涇

縣教諭至淮安召還爲翰林檢討十五年進武

英殿大學士坐弟仲實爲三河知縣薦舉不實詞連伯宗降檢討踰年卒於官所著有南宮使交成均玉堂四

集

明史列鄉錄

曾堅字子白金谿人少與危素齊名元進士累官中大
夫洪武初入朝爲禮部侍郎諳習典章太常議禮皆諮
之自志

吳彤字文明臨川人用薦爲國子監博士改嚴州同知
吳元年召還議卽位郊祀儀注洪武建元擢僉湖廣按
察司上疏言事如沙汰荊州湖泊官省武昌等批驗所
復荊陝二州田額均公安諸縣水夫科繇之類上皆從
之遷北平副使有山居南遊諸集自志

詹鳳翔字道存樂安人洪武進士以病免歸年已八十
手不釋書著有大學中庸章句語孟節要書經釋義書
傳旁通撮要家禮括要律呂新書括要理學類編天體

日道論彭蠡論及奎光堂文集

白志

傅匯字原宗金谿人洪武初纂修經史詔天下學博老
成者入祕閣匯被召預修書成卒於京師上聞訃遣官
賜祭其諭祭文有方資稽古以啟後人等語蓋御筆也

白志

揭軌字孟同臨川人俟斯之後洪武初以明經舉知新
河縣有惠政秩滿歸作杏花春雨亭教授生徒復召主
江西鄉試校定書傳會選每以宿儒備顧問書成賜金
歸所著有新河集

林志

曾旦初名旭臨川人元末三舉解元洪武初以薦厯五經博士召見問郊祀之禮條對無不稱善由是數承顧問除禮部主事卒有文集宋濂序之

林志

吳率正名許金谿人洪武初舉賢良方正知武康縣嘗被誣繫獄父老數百相率詣闕奏請復任上驗其實給榜列名徧示天下以厲廉潔升太原府知府以足疾召至京師賜歸

人物志

張謙字伯恭臨川人洪武初以學行徵授司農丞奉使山東閱郡縣庫藏金帛穀粟措置稱度報命加賜文綺白金尋出爲化州同知孫士貞永樂進士任御史

人物志

涂幾字守約潛生從弟博學善屬文尤工楚辭所著有

涂子類藁

人物志

陸植字伯昂臨川人洪武四年以明經舉除華陽簿招逃亡理誣枉以治最升署丞卒年九十有詩集子煥由賢人君子舉官至沂州知州以善政稱孫最由國子生除監察御史升交趾按察僉事撫綏有方升貴州左參政卒

人物志

熊岳字具瞻鼎次子自少負氣積學悼其父之不幸奮志思紹先緒初授嘉興府知事歷事兵科擢大理評事使西南夷麓川緬甸皆稱上旨未竟其用而歿論者惜之

府志

黎槃

一作槃

字希帥臨川人由明經除南賓主簿莅事廉

明鄰郡長甯近彝獠歲易五守皆爲蠻逐詔以槃爲知州蠻賊解散歲餘戎州梅洞甯遠賊攻州城槃率民兵

出戰自朝至晡墮馬爲賊所害州民祠祀之

林志

董子莊名炎以字行樂安人博學有操行洪武中以鄉薦除雲南學官遷知茂名縣成祖擢爲國子司業出爲趙王府右長史恭謹小心隨事匡正王多過帝輒以責長史子莊夾持王愈堅永樂十八年春當陪祀國社夙興正衣冠端坐而卒

白志

吳溥字德潤崇仁人洪武間南省第一廷對第四授翰林修撰永樂初遷國子司業爲人清慎嚴重造次以禮居官二十餘年操守如一日俸入悉以給親故及卒無以爲殮有占崖集

白志

朱彥昌名宏祖臨川人善詩詞洪武六年以明經舉授荊州稅課不赴卒有東皋舒嘯集弟復心亦以儒士舉

爲奇嵐丞山寇嘯聚朝廷命將勦捕將屠其境復心計禽首惡民得免時年七十無子妾忽生男人謂陰德之

報亦工詩有敬所集

人物志

王時保樂安人洪武戊午薦舉歷升刑部主事按治浙江山東決遣疑獄率多平反以事謫戍雲南御史閻某疏其清苦召還有天涯芳草集

林志

鄒矩字元方宜黃人博學工文與涂幾齊名人稱鄒涂

洪武初以通經儒士薦有文集

人物志

喻德昭臨川人洪武初父以戶無田移種鳳陽時德昭方六歲俾所親育之年十四詣鳳陽求父母不得遂絕酒肉閒關十年得見父於漢中屯所而母已歿乃扶父歸比卒廬墓歿於墓旁

林志

甘瑾字彥初臨川人仕終嚴州同知明初臨川詩派彥初與揭孟同張可立甘克敬皆善學唐人或云餘千人

明詩綜
小序

周彥宗字月窗金谿人洪武初以人材舉歷升陝州知州多方誘誨隨材造就人文大振晉工部員外固辭祀

陝州名宦

人物志

劉璧金谿人蘭谿縣簿時海寇多假富民之名朝廷欲族誅之使者至璧固拒不肯署曰強梁無辜尙不可殺況數十家良民乎使者怒縛璧抵京面奏上命批其頰詞愈厲上悟遣使廉得其實復其官未幾卒民爲立祠

林志

涂自強宜黃人貢入太學授編修命偕戶部李祖欽往

兩淮事畢報命稱旨賜名忠升台州知府在任二年上

廉其治績特召入京台人祀之名宦

人物志

黃清字用澄宜黃人洪武中由歲薦上春官奏對稱旨
拜御史涼國公藍玉謀不軌株連萬五千人清上言波
及者眾願從罪疑欽恤之意上大怒趣誅之後三日上
忽省清疏赦諸黨坐者詔恤其家

人物志

饒侃字仲恭臨川人以儒士薦授翰林院博士兼潭王
紀善王薨上憐其老命歸爲宜黃縣教諭侃有才望文
章典雅嘗典河南四川文衡士服其公號率齋學士陶

凱序其集

人物志

孫伯堅

一作伯恭

臨川人洪武中武庫員外郎廷臣薦爲四

川參政持政寬平不事苛察吏民德之官至鴻臚少卿

林志

黃紹烈名克臨川人洪武進士知瑞安縣有逋租糧長逃匿山海所司坐以劫掠紹烈力白其事未幾自免歸撰禮經博約策場總龜自號石泉所著詩文曰歸田類

藁

府志

陳迪宣城人祖宥賢明初從征有功調世撫州守禦百戶因家焉迪以薦爲郡學教授又入翰林建文初官至禮部尙書太子太師靖難兵起督兵江上還宣城成祖旣入召問迪抗節不屈與子鳳山丹山等六人磔於市幼子珠生五月乳母潛置溝中得免八歲爲怨家所訐成祖宥其死戍撫甯徙登州洪熙初赦還宏治閒裔孫鼎舉進士仕至應天府尹剛鯁有聲

國朝賜迪諡忠烈

明史

勝朝殉節諸臣錄

謹案陳迪

縣定籍迪宜
爲臨川人

王英字時彥金谿人永樂進士選庶吉士讀書文淵閣
與王植掌機密文字修太祖實錄授修撰進侍講帝北
征英扈從問以方略英曰天威親征彼必遠遁願勿窮
追榆木川之變仁宗在東宮命英與尙書蹇義等定喪
禮議政事宿內閣者七日仁宗卽位進學士再進右春
坊大學士乞歸省宣宗立還朝是時海內宴安天子雅
意文章每與諸學士談論文藝賞花賦詩禮接最優渥
嘗謂英曰洪武中學士有朱濂吳沈朱善劉三吾永樂
初則解縉胡廣汝勉之毋俾前人獨專其美修太宗仁
宗實錄成遷少詹事賜麒麟帶正統元年命教習庶吉

士開經筵爲講官修宣宗實錄爲總裁實錄成進禮部
左侍郎年七十再乞休不許擢南京禮部尙書俾就閒
逸居二年卒年七十五賜祭葬謚文安後改謚文忠子
裕累官至四川按察使

列卿錄

劉濬字士哲崇仁人永樂進士以庶常改知臨汾縣薦
升浙江僉事温州衛指揮恃靖難功多不法濬詣闕暴
其罪語太峻落職居臨清十餘年結草爲庵教授生徒
用薦起爲吏部主事扈駕征漢藩卒於京著草庵集

人志

梁萼字紹輝臨川人永樂初郡舉應遺賢授都昌訓導
預修太宗仁宗兩朝實錄書成賜鞍馬白金乞歸所著
有貞趣軒集子矩字式之由儒士官教諭年八十餘卒

所著有甯靜軒集孫善字明善領鄉試力學有文行所

著有復齋彙

人物志

伍徵字紹庸臨川人永樂中任石泉訓導教人不倦生

徒履滿戶外署縣事愛民如子居官淡泊去任行李蕭

然子福成化中任陝西提學副使

陝西通志

饒安字用中崇仁人永樂進士由庶吉士出爲陝西僉

事三秦故艱於水安爲開便河十餘里導水至城下民

德之勢豪占軍田四千九百餘頃奪以還屯所著有中

庵集

白志

袁旭字廷輔樂安人永樂進士初爲江津令正統初以

輔臣薦知甯國府郡故繁劇處之裕如次舍學宮一新

宛溪二橋尤爲百世利賴詔簡天下廉能官十人旭居

其一尋以涇人程御史誣語被逮斃獄父老冤之

分省人物

鄒良樂安人永樂進士任松溪知縣松有銀鑛爲民患奏罷之升衡州知府致仕所著有四書編言存養錄分省人物

蕭儀字德容樂安人永樂進士任吏部主事建言謫戍廷臣疏救之還職又言罷營繕惜名器等事忤旨復下獄死有韞線遺藁

人物志

許同書臨川人永樂進士授御史時靖難功臣以賜田爲民害首疏抑之權貴斂手出按兩廣疏稱粵中阻山瀕海不當以勦戚典戎又劾采珠中使爲所誣死廣民冤之著有梧臺清響集

人物志

吳昌衍臨川人永樂進士歷官御史都御史陳智以私怨令昌衍劾山西按察使徐永達不聽後智以堂考罷永達昌衍以事聞智被黜時論偉之朝議欲移邊城昌衍奏以勞民傷財事遂寢歷四川參政致仕

分省人物考

王汝績金谿人由舉人薦知絳州絳土狹民繁產薄稅重汝績相其地利教以養桑不數年民業饒給歲課布帛氈裘諸物任民所齎特取租辦而已人甚便之

分省人物考

吳餘慶字彥積宜黃人永樂閒以薦除中書舍人歷官右通政致仕在朝三十餘年忠謹無過應制賦詩每蒙褒錄工楷書凡有金石文字多奉敕書之

林志

何自學金谿人宣德進士由刑部主事歷僉廣西山西

按察使丁內艱服闋升陝西按察使繫囚眾多自學審

閱旬日囹圄一空屢任法司洞識大體時論稱之

人物志

聶大年字壽卿臨川人父同文中書舍人大年生而一目重瞳比長博學善詩古文書得歐陽率更法宣德末薦授仁和訓導母卒歸葬哀感行路里人列其母子賢行上之有司詔旌其門服闋分教常州遷仁和教諭薦入翰林未幾得疾卒始尙書王直以詩索錢塘戴文進畫言昔與文進交作詩一聯至是十年始成大年題後曰公愛文進畫十年不忘使以是心待天下賢者甯復有遺賢哉直聞言不怒不薦及大年卒爲志墓

明史白志

黎公弁字之冕臨川人宣德庚戌由經明行修薦任教諭累典文衡纂臨潁蒲圻二志所著有尊川蠅鳴等集

邵二泉亟稱之弟公穎字之秀與兄同薦歷仁和侯官教諭少保于謙薦升監察御史所著問齋日錄數十卷

人物志

姜洪字啟洪樂安人宣德進士選庶吉士預修宣宗實

錄進修撰有松岡文集十一卷及策府詳述行世

林志

黎近

一作久

字之大臨川人宣德閒應文學材行科歷高

要知縣時徭賊據城近爲榜文諭降之被誣奏逮繫刑部獄中十年作大明饒歌鼓吹曲十二章太平頌幸太學頌二章獻之英廟嘉歎命釋之召見獻麒麟白象二頌上欲處之禁林爲忌者所沮所著未齋藁奉心集近百卷兄公輔字之及善屬文有醉墨窩集書集言百餘

卷

人物志

伍禮字天秩臨川人正統初由明經任蘇州訓導歷知曹州有權倖據民田六千七百餘頃恃勢凌轢民流散禮執奏之得復所侵地升南陽知府未任卒所著有南

坡集

林志

謝輔樂安人正統進士累官浙江參政金華盜聚入其壘諭以禍福賊感泣解散輔爲人與物無忤操履端方始終如一所著有守拙藁四子俱舉進士

白志

何俊字士高金谿人正統中任浦城縣丞處州盜發俊築城塹治器械賊不敢入旣而奉檄出崇安賊乘隙來侵俊馳閒道歸撲剿餘黨民賴保障

福建通志

應用翔宜黃人正統閒偕同邑羅守志符大德黃彥澄鄒思學鄒思齊鄒大珏鄒大諤八人出粟助賑敕書旌

表

縣志

單宇字時泰臨川人正統進士除岷縣知縣調諸暨遭喪服除待銓京師適英宗北狩宇憤中官監軍諸將不得專進止致喪師疏請盡罷之以重將權景帝不納初王振佞佛修大興隆寺日役萬人靡帑數十萬英宗爲賜號第一叢林至是宇上書言前代人君尊奉佛氏卒致禍亂近男女出家累百千萬不耕不織蠶食民閒營構寺宇徧滿京邑所費不可勝紀請撤木石以建軍營銷銅鐵以鑄兵仗罷遣僧尼歸之民俗庶皇風清穆異教不行疏入爲廷議所格復知侯官

白志

楊貢字彥魁樂安人正統進士任御史按治蘇松歲大饑以便宜發兌軍米數十萬賑給民賴更生升蘇州知

府郡有富民武斷鄉曲貢實於法都御史崔恭庇富民

劾貢欺罔坐免官有雪艇集

人物志

伍福字天錫禮弟正統甲子鄉舉授咸甯諭用薦升陝西按察副使提督學政福風格高邁言動有法詩文典雅家藏書數千卷手自校讐至老不倦嘗編咸甯縣志陝西通志修纂有法所著南山居士集雲峯清賞集藏於家

人物志

王常字大經臨川人正統進士除御史巡歷居庸城永安以劾諸陵修葺要害復巡南畿風裁茂著劉儼作兩甸觀風記以紀其績

分省人物考

黎擴字大量臨川人正統初由賢良舉授貴池訓導升蘇州教授學士錢溥稱其文可造曾王門戶自號雅齋

所著學鳴藁子憲少馳文聲成化乙酉舉江西鄉試第

一卒

林志

黃矩字憲則金谿人以材德薦預纂英廟宣廟實錄及明一統志所著有林塘吟藁希古齋集崇正錄等書孫

株字應沙倡明青田之學著大學中庸解

林志

吳英字士傑臨川人通天文星數之學正統閒被誣謫戍京衛武定侯薦之授五官司晨嘗言戊辰歲北方有兵變英廟在南內聞其言命卜得飛龍在天之占復辟賜宅一區欲官以卿寺謝曰臣福薄不足勝此仕至春官正子昊以天文累官太常少卿

人物志

羅明字元亮崇仁人景泰進士除御史巡視浙江鹽課改廣西按察僉事時蠻獠寇賓州總戎畏縮逗留不進

明率所募民兵格戰俘馘甚眾生獲賊首韋諫誠捷聞

賜敕獎諭卒官副使

林志

黃會字吉劭臨川人景泰進士授行人司副持身謙謹

升南京屯田司郎中時堂官缺命會署堂事寅案敬服

升遼東苑馬寺少卿

人物志

謝綬字維章輔子景泰進士由郎署升四川參議平崇

彭寇改廣西副使適荔浦獠獞叢起進勦平之請分置

永安州參政陝西築引流隄民受其利累升副都御史

巡撫湖廣歷升南京禮部尙書因災異陳言二十八事

俱剴切優詔從之卒贈太子太保

人物志

廖簡字行儉崇仁人性端重嚴謹景泰鄉舉初授金華

教授改廣東增城以師道自任爲人恬退不事表暴羅

倫稱其身不擇衣居不擇地仕不擇官所爲詩文根據

義理自號介庵有介庵文集

人物志

徐瓊字時庸金谿人天順丁丑進士第二人官翰林編修與修英廟實錄歷升南京翰林院侍讀學士掌院事宏治中仕至禮部尙書加太子少保累疏乞休給驛歸里所著有東谷文集

人物志

吳與弼字子傳溥子年十九見伊洛淵源圖慨然嚮慕遂罷舉子業盡讀四子五經洛閩諸錄不下樓者數年中歲家益貧四方來學者約已分少飲食教誨不倦正統景泰閒屢薦不出天順元年石亨欲引賢者爲己重謀於大學士李賢屬草疏薦之加東帛遣行人曹隆賜璽書齋禮幣徵與弼赴闕比至授左春坊左諭德與弼

疏辭召見文華殿顧語曰聞處士義高特行徵聘奚辭
職爲對曰臣草茅賤士本無高行陛下垂聽虛聲又不
幸有狗馬疾今年且六十八矣實不能官也帝曰宮僚
優閒不必辭賜文綺酒牢遣中使送館次又疏稱學術
荒陋苟冒昧徇祿必且曠官詔不許乃請以白衣假讀
祕閣書帝曰欲觀祕書勉受職耳命賢爲諭意留京師
二月以疾篤請放還賜敕慰勞資銀幣復遣行人送還
命有司月給米二石成化五年卒年七十九與弼始至
京賢推之上座以賓師禮事之編修尹直至令坐於側
直大愠出卽謗與弼及與弼歸知府張瓚謁見不得募
人代其弟投牒訟與弼立遣吏攝之大加侮慢始遣還
與弼諒非弟意友愛如初編修張元禎不知其始末遺

書誚讓直復筆其事於瑣綴錄又言與弼跋亨族譜自稱門士士大夫用此訾與弼後顧允成論之曰此好事者爲之也與弼門人後皆從祀而與弼竟不果所著目錄悉自言生平所得其門人最著者曰胡居仁陳獻章婁諒次曰胡九韶謝復鄭伉

明史

胡九韶字鳳儀崇仁人少從吳與弼學卽不習舉子業以道自期吳器之諸生從游者恆令先見九韶及吳歿門人多轉師之家貧課子力耕僅給衣食成化中卒九韶爲人卓然動修規矩其詩文務典實不樂華藻有文集藏於家

明史吳與弼傳
明儒學案

車泰字子謨金谿人與兄弼宗弟亨俱受業吳與弼而泰最久篤信力行師友咸稱之與弼應聘辭歸遣泰詣

闕謝大臣楊守陳邱濬皆有論薦期於用世而泰竟不

仕泰之學尤邃於易春秋有敦復遺藁

人物志

饒烈字丕承臨川人世業春秋與姪嶽同受業吳與弼之門潛心經學嘗揭聖賢法言於軒楹閒以自警策與弼題其讀書之處曰麟經軒爲之記晚遷居父墓之側

自號巢雲有巢雲藁二卷

人物志

曾自明樂安人景泰鄉薦授河南蘭陽縣教諭以造就人才爲己責貧乏者多周給教訓如子弟羅倫嘗曰爲師儒者皆得曾自明道何患不立人才何患不成哉

林志

李大章字定庵臨川人嗜古篤修不樂仕進與吳與弼胡居仁齊名與弼赴聘大章作詩送之有去歲徵書來白屋何時行李出青山之句蓋不欲其行也

人物志

吳宣字師尼崇仁人景泰四年試南省歸築巴山書院肆力經籍已授左軍督府經歷劾長寮不法繫獄十年始得白改中府升鎮遠知府道疾卒有野庵文集

人物志

陳勉字自勉臨川人祖殷嘗音釋十八史略著有湖海集勉登成化進士除工部主事出知泉州有捕海寇功改知福州府終河東轉運使長子威次子嬰俱進士威

監察御史嬰刑部主事

林志

徐霖字用濟金谿人成化進士爲給事中言事出爲嘉興知府致政歸屢薦不起吟詠最富有別齋詩集子行

慶宏治進士官至御史

人物志

吳哲字克明臨川人成化進士知嘉定縣築隄四十里以捍海潮定兩京歲額費立小婁塘以便民呼爲吳公

市升御史人不敢撓以私巡兩淮鹽課鬻餘鹽二千餘萬引開各場運河九十八道再巡畿內權寵家侵據民地若干悉復之

分省人物考

吳嵩臨川人成化進士累升揚州知府築隄以捍水患至今祀之與巡漕使者相許御史褫官而嵩亦落級補

福州運同

林志

姚隆字竹庵臨川人成化進士授行人時出使者多挾貨幣交易隆止挈一隸同行餽遺一無所受歸卽致仕益肆力問學博聞強記其著述甚富

府志

謝緝字維熙樂安人成化進士授醴陵知縣有善政厯工部郎中知處州府政尙平易有古循良風年未六十乞休弟紳以孝行聞

分省人物考

董時望字雪峯樂安人幼孤事母孝成化進士授御史
慷慨建白性剛介不苟合豪右憚之居官三十餘年比
卒無以爲殮所著有雪峯藁

府志

王約字資博臨川人成化進士知平陽縣毀淫祠六十
餘所以建社學歲饑請發粟當路不可約曰民困甚矣
救民獲罪所不辭也卒發之擢御史出巡蘇松湖廣風

裁甚著

府志

吳昊字仁甫臨川人爲五官保章正成化間擢監正觀
象臺舊制渾儀黃赤二道交於奎軫與今之四正戾其
陽經南北軸不合兩極出入之度陰緯東西窺管又不
與太陽出沒相當故雖設而不用所用簡儀則郭守敬
遺制也而北極雲柱差短以測經星去極亦不能無爽

吳言授時厯元起至元辛巳今已二百一十年與歲行
差三度餘矣儀象於觀天最急失今不改恐漸疏謬詔
下禮部議如其說製木樣測驗久之乃鑄爲新儀更二
道環交於璧軫其經緯雲柱皆與天合正德初進太常
寺正卿

費文憲集

黃本字喬嶽樂安人進士以御史巡按雲南疏劾守監
鄭文奎不法事權寺汪直庇之誣本落職部署臺省交
章論救不報宏治初召還未及任卒

安志

吳世忠字懋貞金谿人宏治進士授兵科給事中兩畿
及山東豫浙饑條上興水利復常平二事多施行尙書
王恕被訐求去疏請留之出勘大同備陳邊務廢弛士
卒困苦之狀因言總兵神瑛巡撫劉璘中官孫振等貪

利畏敵瑛落職職振召還江西盜起請簡巡撫黜有司貪殘者遷吏科擢湖廣參議坐事降山東僉事召爲光祿少卿再遷大理少卿以右僉都御史巡撫延綏引疾

歸明史

洪鍾字季和崇仁人七歲隨父之京有以其所書進者憲宗見其字畫端楷召見賜入翰林院讀書宏治庚戌登進士除中書舍人升禮部員外郎卒年二十七

林志

吳潛字顯之臨川人宏治進士歷升雲南副使權璫姚體忠奉敕徵餉司府以屬禮謁之潛不屈遂拂衣歸世

稱兩川先生

人物志

李哲字希先臨川人宏治進士嚴毅端潔善造人才在南部抗疏敢言今添設江西巡撫九江諸道兵備皆所

建白所著有南野集祀鄉賢孫中以恩選爲王府教授
建崇儒書院復捐田以資講會學者崇祀之稱爲致吾

先生

府志

王萱字時芳金谿人宏治進士選庶吉士改給事中時
盜起四川敕萱往視師甫涉蜀境聞賊帥詭降且要求
臨江市安插萱移書巡撫高崇熙曰未有羣蜂一方面
能貼然者崇熙不聽旬日賊果叛萱以聞崇熙被逮又
疏劾罷總制尙書洪鍾朝廷爲改用彭澤及澤屢捷欲
罷遣邊兵萱復以爲不可故蜀寇芟薙殆盡論功拜通
政使有青崖奏議文集

林志

洪範字邦正金谿人宏治進士知嘉興縣事承知府楊
繼宗之後廉靜寡欲民間語云洪令楊守承前啟後擢

御史提督畿內學政升河南提學副使

分省人物考

樂護字鳴殷臨川人宏治進士歷宣城山陰知縣擢給事中前後糾劾疏十數上擢光祿寺少卿尋以知天文歷法兼掌欽天監事三年五星聚營室護上書言占書曰五星之聚是謂改易王者有德受慶無德受殃聚房而周祚以昌聚箕而齊桓用霸漢興聚井宋盛聚奎是四者皆當更革之時一福一禍昭然不惑惟天寶聚於尾箕唐德弗迪卒有安史之亂皇上中興五星適聚可不益修聖德以承此大慶乎疏入下錦衣獄大臣交救獲免降爲宿州知州稍遷河南僉事以陝西參政歸有

木亭雜藁

人物志

吳華字德輝東鄉人宏治進士由崇明令擢御史兩疏

乞建儲廷杖巡按浙江出知襄陽府罷歸宸濠謀逆招誘東鄉降寇城中驚擾華與巨室何清楊文憲畫計斬賊首數人城遂全

分省人物考

江珏字玉成金谿人宏治進士知華州升刑部員外己卯武宗南巡首倡十三司連名疏諫上怒罰跪午門三日廷杖革職世廟卽位首詔褒之弟瑭以太學生謁選疏劾大學士劉健李東陽專權自恣下鎮撫司健等連名具疏請開言路以容直臣自陳休致以避賢路詔釋之授甯德主簿不赴

人物志

安志

謝志舊案瑭安

後

謹案劉李亦明之賢相並無專權自恣之迹瑭以太學生妄加彈劾是沽名也白志削之誠是今姑從謝

志增

劉璨臨川人由鄉舉知綿州性廉介守城禦賊居民用

安聞母訃過哀而卒無以爲殮人以廉孝稱之

四川通志

廖輕崇仁人宏治舉人知保昌抑豪強表貞節政聲籍籍南海霍韜起爲吏部侍郎所至長吏跪迎輕獨長揖不拜韜益重之未幾南海令缺太宰汪鉉以巨邑難其人韜曰無踰廖輕者遂遷知南海時邑中多顯者卿相侍從閭里相望輕不少徇人多其介謂不負所舉云

廣東

通志

江西通志卷一百五十二

江西通志卷一百五十三

列傳二十

撫州府三

明

王冀字東石通政萱弟正德進士授禮部主事上三疏
一言宋儒羅從彥李侗當從祀孔廟一言公伯寮馬融
賈逵王弼何休戴聖王肅杜預當罷從祀一言忠烈如
龍逢蘇武等二十人名臣如汲黯宋璟等二十人名儒
如王通胡瑗等十四人祀典皆宜補入厯官浙江提學
副使致政歸與同邑洪範黃直吳悌共爲翠雲講會學
者宗之

人物志

饒瑄字文璧以字行臨川人正德鄉舉少不羈好馳馬
舞劍弱冠委已於學卽不爲舉業剽掇之習星厯算數

山經地志九流百家之書無不通徹已乃覺其泛初善橫渠以禮爲先之教中慕邵子靜生百原之學最後獨深信象山而遵體之蓋文壁之學凡屢變而卒歸於簡

易云自號行齋學者稱爲行齋先生

人物志

陳九川字惟濬號明水臨川人母夢吞星而娠年十九爲李夢陽所知正德進士請告三年授太常博士武宗欲南巡九川與舒芬夏良勝萬潮連疏諫止午門荷校五日杖五十除名世宗卽位起原官進禮部員外郎中以主客裁革妄費羣小恨之張桂與費宏有隙誣九川以貢玉餽宏使通事胡士紳訟之下詔獄榜掠謫鎮海衛已遇恩詔復官致仕周流講學名山如台宕羅浮九華匡廬無不至也一時講學諸公謂明水辯駁甚嚴令

人無躲避處卒年六十九祀學宮

明儒學案 謝志舊案府志九川受業陽

明問學至忘寢食陽明歿九川亟往經理其家

劉穎字時秀臨川人正德進士由開化令徵拜御史以議大禮忤旨廷杖出按廣西時田州岑氏構亂請兵督勦斬岑邦彥於工堯隘穎功居多復按貴州以疾辭歸尋卒所著有小遲集

人物志

葉竦字喬新臨川人正德進士授龍泉令縣多逋賦竦以誠心開諭積欠盡完調慈谿谿禱雨立應嘗大火拜之而減傳以爲神艱歸補常山未朞月縣復大治竦更三縣率前人以爲難而竦輒著績升刑部主事得疾歸卒

府志

劉最字振廷崇仁人正德進士由慈利知縣入爲禮科

給事中世宗議定策功大行封拜最疏止之中官崔文以禱祠事誘帝最極言其非忤旨出爲廣德州判官尋逮下詔獄戍邵武久之赦還家居二十餘年卒

明史鄧繼曾傳

劉雋字振道最弟正德進士歷刑部郎中嘗疏爭世廟議禮事不報尋爲遼陽分守參議謝歸尚雍睦敦實行古道自持有一斑集牘語等書人稱華嚴先生

人物志

黃直字以方金谿人嘗遊太學諫武廟南巡癸未進士復疏陳勤治保躬四事授漳州府推官以長揖忤直指遂誣直受金活人赴訊日雷雨暴作事大白復疏請豫建太子繫錦衣獄後上感悟釋之謫判河州丁艱服闋時編修楊名以劾冢宰被逮朝臣無敢救者直抗疏救之併劾邵元節等左道惑民上怒廷杖戍雷州穆宗登

極贈光祿少卿學者稱卓峯先生

人物志

章袞字汝明臨川人嘉靖進士選授御史督學南畿狷介端嚴請屬不行士習一時蹶興務講求經濟實學痛黜詞章之習以劾左道亂政譏刺時宰左遷相從講學者益眾稍遷陝西副使督學政乞休不俟報而行所著章子瑣言學庸口義及詩文若干卷

府志

黃紀字子陳臨川人嘉靖進士擢御史視居庸關首疏內臣紀揚奸狀上雖置揚於法而紀亦罷稍遷河南僉事紀儀觀甚偉遇事果決無所避以此見忌

府志

王紹元字希哲金谿人鄉舉授碭山令河決築隄三十里捍之招逋民給種復業又立均地等法擢御史疏請罷馬市巡按貴陽宣慰安萬全擅兵爭繼首疏按之轉

湖廣副使流寇猖獗撫臣薦紹元監軍結閒謀得其降
黨黃洪逵爲鄉導焚賊營斬獲無算功上賜白金綵幣

升河南參政致政歸

府志

吳悌字思誠金谿人嘉靖進士除樂安知縣調繁宣城
徵授御史十六年應天府進試錄考官評語失書名諸
生答策多譏時政帝怒逮考官下法司停舉子會試悌
爲舉子求寬坐下詔獄出視兩淮鹽政海溢沒通泰民
廬悌先發漕賑之而後奏聞尋引疾歸還朝按河南伊
王典模驕橫憚悌遺書稱爲友悌報曰殿下天子親藩
非悌所敢友悌天子憲臣非殿下所得友王愈憚之夏
言嚴嵩當國與悌鄉里嘗謁言眾見言新服宮袍競前
譽之悌卻立不進言問故徐曰俟談少閒當以政請言

爲改容及嵩擅政悌惡之引疾家居垂二十年嵩敗起
故官一歲中累遷至南京大理卿時吳嶽胡松毛愷並
以耆俊爲卿貳與悌稱南都四君子隆慶元年就遷刑
部侍郎明年卒悌爲王守仁學然清修果介反躬自得
爲多萬厯中贈禮部尚書諡文莊鄉人建祠與陸九淵
吳澄吳與弼陳九川並祀曰五賢祠學者稱疏山先生

明史 謝志原案孫承澤
四朝人物考悌諡文端

易文臨川人試棘闈擬定第一有嫌其卷太奇者遂不
果以選貢業辟雍爲高淳縣丞署縣篆公廨學宮先後
經營苟利於民髮膚無愛建隄捍民比於蘇隄在高淳
三年竟拂衣歸里生徒雲集所著書詩春秋大義又秋

潭集若干卷

分省人
物考

董燧字蓉山樂安人嘉靖鄉舉任枝江縣時施州諸司爭立連兵十數年諸帥莫能平燧奉檄入壘諭以朝廷恩禮遂服撫按稱其以一騎當數萬雄師兩遷至刑部郎中大新所泉書院聞王艮倡道海濱亟往師之歸與羅洪先作崇正會所著有周易問答圖通問答

人物志
縣志

謝相字大卿金谿人由鄉舉授東安知縣初歲饑吏僞

增丁口冒賑繼者遂按籍征賦民困甚相爲請得減千

三百戶奸人殺四人棄其屍獄三年不決相禱於神夜

夢四人泣語屍所獄遂成子廷諒廷讚俱進士

白志

陳宗慶字崇吉金谿人嘉靖舉人知嵯縣治尚禮教弟鏜同科舉人任鄭州鏜弟鉦以丙午舉人授榮昌令皆以方正見稱鏜子一夔進士歷温州知府有惠政從子

所敏同登進士工部郎中節冗費多善績先後著聲金

谿言家法者必推陳氏

府志

徐良傅字子弼東鄉人嘉靖進士館閣諸公屈指人才必以良傅爲首以武進令卓異召拜吏科給事中會迎仙宮成朝議稱賀良傅謂異端充塞不能匡救忍從諛乎上疏語侵權貴幾罹不測罷歸築廬峴臺下以古文法教授里中所著有愛吾廬搶榆等集

人物志

陳玠字文晦臨川人嘉靖進士由行人擢御史風節甚著督饒河東首建書院屏居十八年召還厯卿寺建牙西蜀平都蠻草坡諸寇已起吏部侍郎晉左都御史巨璫敗詔籍其家得朝士姓名於記牘中惟玠與太宰嚴清不與立朝風采凝峻室無姬媵門無游客上數顧而

江門縣志卷之三 三
三
嘆曰真重臣也子以德進士仕終副使

府志

曾佩字德甫臨川人嘉靖進士官御史巡視居庸關疏九邊糧餉論馬市邊政諸疏皆中肯綮以建儲事抗疏杖戍當州與湛若水何塘講明理學不以斥逐介意穆宗登極赦還臺省薦章十數上竟不起有元山文集子如海從子如春從孫國禎應瑞應星俱進士

府志

黃鉦字克靜宜黃人嘉靖進士汝甯推官擢刑部主事忤權貴左遷歷山東濱州知州地斥鹵民多流移鉦平賦緩徵給種發粟逋民復業者數千家著有應山集法律管見元風問難

人物志

黃希憲金谿人嘉靖進士歷官知嘉興府以清白自矢置天璽簿登記贖鍰毫不自私又勤於課士躬親校藝

爲諭俗文以諷戒小民水旱步禱屢有靈應

分省人物考

譚綸字子理宜黃人嘉靖進士除南禮部主事遷職方郎中台州知府沈毅知兵時東南倭患已四年朝議練鄉兵禦賊參將戚繼光請期三年綸亦練千人立束伍法未久卽成精銳倭犯柵浦自將擊之三戰三捷又連破之章安葛埠南灣加右參政會憂去以薦起復將浙兵尋改官福建擢右僉都御史代游震得巡撫任倭屯崎頭城都指揮歐陽深捕戰中伏死倭遂據平海衛陷政和壽甯各扼海道爲歸計綸環柵斷路賊不得出移營渚林繼光至綸自將中軍總兵官劉顯俞大猷將左右軍令繼光以中軍薄賊壘左右軍繼之大破賊復一府二縣詔加右副都御史考舊制建水砦五扼海口薦

繼光爲總兵官以鎮守之境內悉定四十四年冬大足民作亂陷七城詔改綸四川至已破滅雲南土酋鳳繼祖遁入會理綸會師討平之進兵部右侍郎總督兩廣軍務兼巡撫廣西招降岑岡賊江月照等綸練兵事朝廷倚以辦賊遇警輒調居官無淹歲追南寇略平而邊患方未已隆慶元年給事中吳時來請召綸繼光練兵詔徵綸還部進左侍郎總督薊遼保定軍務自兵事起邊臣牽制議論不能有爲綸疏切言之而巡撫劉應節果異議巡按御史劉翹巡關御史孫代又劾綸自專帝悉以兵事委綸而諭應節等無撓綸初至按行塞上遂與繼光圖上方略築敵臺三千起居庸至山海控守要害以功進兵部尚書其冬予告歸神宗卽位起兵部尚

書五年卒官贈太子太保諡襄敏綸終始兵事垂三十

年與繼光齊名稱譚戚

明史
白志

陳洪濛字元卿臨川人進士由主事升彰德知府時鄭

王好文學譔四箴規時事屬庶人佑檣

譔志
誤善

誣王上怒

甚遣大臣就訊洪濛白其狀眾咸爲危之乃曰吾守三

尺耳奈何令上有蔽讒聞戕骨肉名獄上止錮王終身

累升參政分守冀南道禽奸偵又捕白逆教諸賊特賜

帑金會伊王恣橫不道都御史疏其罪遣使驗問不服

乃廣賂求援上更遣侍郎趙某覆按趙疏洪濛名與俱

上允之曰是嘗按鄭藩者邪聞命卽往盡得王諸不法

事辭具服國除洪濛兩平章宗正事皆當旨以晉藩按

洛尤異數云仕至副都御史巡撫貴州兼督湖北川東

軍務致仕

山西通志

周宗武字文啟臨川人爲宜都令會峒賊寇施州誘其渠殲之治行爲十五郡最賜璽書褒美擢廉州知府清操愈勵人謂之眞廉州云

府志

徐善慶字元禎金谿人嘉靖進士知汝州教民植稻至今稱其田爲徐公田擢職方郎與分宜不合棄官歸養所著有武選集來清軒詩

府志

高應芳字惟實金谿人嘉靖進士巡按山東恩威並著時青州有聚眾稱勤王兵者應芳探其奸密禽首惡伏法餘黨解散晉太僕卿疏馬政八事詔著爲令所著有

羊洞遺藁谷南集

府志

舒化字汝德臨川人嘉靖進士授衡州推官改鳳陽擢

戶科給事中隆慶初遷刑科帝任宦官旨多從中下化
言法者天下之公大小罪犯宜悉付法司不當則臣等
論劾若竟自敕行則喜怒未必當而法司與臣等俱虛
設詔是其言有校尉負屍出北安門兵馬指揮孫承芳
見之疑有奸繫獄鞫訊詞連內官李陽春陽春懼訴於
帝言尉所負非死者出外乃死承芳妄生事刑校尉帝
信之杖承芳六十斤爲民化請以陽春所奏下法司勘
問不納時高拱當國路楷楊順以搆殺沈鍊論死拱欲
爲楷地謂順首禍順死楷可弗坐化取獄牘示拱曰獄
故無鍊名有之自楷始楷誠罪首出爲陝西參政再疏
致仕歸萬厯中召拜刑部侍郎會尚書缺手詔用化續
修會典因輯嘉靖三十四年以後事例與刑名相關者

三百八十二條奏之詔頒示中外尋稱病乞歸卒贈太

子少保諡莊僖

明史

陳文燧字汝相臨川人嘉靖進士授御史首疏正諸臣從祀條陳時宜十二疏皆中肯綮巡宣大糾代藩橫肆疏互市誤國計大觸時忌移巡雲南督撫藉征儂妄殺報功者甚眾復株連無辜文燧悉平反之設義冢收葬幾數十萬滇獄囚四百人奉旨決處止決四人不稱旨外謫歷參政拂衣歸臺省交薦不赴

人物志

鄒子先宜黃人令常山捕獲巨盜金珠萬計知爲大賈所失悉以歸之士民爲建卻金亭歷升高州知府不赴

府志

李伯廉金谿人嘉靖舉人知郴州歲歉且大旱枕藉死

者無算伯廉齋居步禱忽大雨浹日五鶴從空飛繞士民歡呼播酋蠢動擢馬湖僉事以勞卒於官

府志

劉世享字覺悟臨川人嘉靖進士爲涇縣令序立條教山澤之利聽民自取置社倉教積貯輸征有等胥徒凜若負霜邑故多虎害爲文以禱虎負子去擢吏部士民泣祖於采石卽其地亭焉邑四鄉各有祠

分省人物考

桂天祥字子興臨川人嘉靖進士授祁門知縣時江浙界中山盜竊發漸徧徽州祁門故無城天祥刻日興築民不勞而功究至今賴之擢御史出按山西世宗有廢后之議舉朝無敢言者天祥具疏痛切不報出爲順德知府攷績天下第一卒於任時年四十五

分省人物考

陳文煥字靜菴文燧弟嘉靖進士由紹興府推官拜侍

御首疏請雪兩京冤獄遂著爲例出按陝西直聲大振
復出爲嚴州知府乞歸杜門十餘年終浙江布政司參

議

分省人
物考

聶廷璧字子雍金谿人嘉靖進士由郎署出爲潁州僉
事有鳳陽陵監夙養亡賴前後使者皆不敢問廷璧密
獲殲之璫忿甚曰伺短長竟無可乘升福建兵備副使
有平倭功請終養歸

府志

曾如春字景默嘉靖進士巡撫河南時鑛使四出獨中
州倚如春調劑得免騷動又潞藩數潛遊所在震驚抗
疏以聞詔責護衛諸臣民始晏然以工部侍郎總督河
道疏築有法至今賴之

府志

李東明字勿齋臨川人受學於羅汝芳年未四十棄舉

子業爲丹徒教諭遷柳州不赴教人務以躬行爲主規
言矩行年八十餘監司郡縣造廬請益言不及私婦人
孺子皆稱爲勿齋先生鄒元標諸公嘗引吳與弼陳獻
章例薦於朝移書止之講學崇儒書院門人有欲傳其
語錄者東明曰語錄原非先儒之意且其字義半用佛
經皆門人之誤也其持論矜慎如此所著有孝悌格言

勿齋集

人物志

徐汝陽臨川人隆慶進士爲武進令巡撫海瑞薦爲武
選主事條上兵事十二策得旨以僉事討賊廣東單車
抵瀧水圖上方略請罷客兵專用廣兵乘賊出掠提精
銳五千人趨峒火焚藤橋賊聞官軍旣入驚潰渠魁就
俘因以瀧水爲羅定州置東安西甯兩邑適外艱歸民

遮道哭留厯官光祿寺卿

人物志

帥機字惟審臨川人隆慶進士由禮部郎出守思南謫
鄴丞時甯夏班師上平西夏頌詔錄史館皇太子出閣
又獻出閣講學頌皆嘉納機慧敏純固肆力討誦嘗日
夕忘寢食吏事非其所長著南北二京賦表上於朝有
陽秋館集四十卷行世

府志

朱東光臨川人隆慶進士初授平陽知縣有土豪殺人
匿屍數十年不能斷東光甫下車卽廉得眞屍於郊外
民以爲神擢戶科給事中廣東參政致仕歸修宗譜建
祠宇置義田有范文正遺風

府志

張應雷金谿人隆慶進士授湖州府推官會大旱祈求
僚屬視爲故事應雷獨齋居露處爲民步禱大雨隨之

以剛方坐謫再補楚令拂衣歸應雷工韻語善書畫所

著有金谿文獻考

人物志

王懋德字敬甫金谿人隆慶進士授翰林編修侍經筵尋引假歸郡邑長欲望見顏色不可得以南少司成召起舟次臨清疾卒貧無以殮賻贈交至其子奉遺命謝

卻之

人物志

周邦傑字英甫臨川人隆慶進士爲給事中請汰承運等庫內官梁忠等七百人直聲大振時黃道瞻曾乾亨鄒元標魏允貞等相繼以言事觸譴皆上疏力救獲貸又力雪建言部臣趙世卿之冤厯升通政疏乞終養嚴居二十餘年母喪哀毀幾殆所著有金石山人集

府志

王民順字道服金谿人隆慶進士宰廣甯猺獷寇張奉

檄募兵於浙約東嚴明馳數千里無敢譁者授御史按
蘇松請罷織造蠲逋賦終左布政使

府志

辜俊字子偉臨川人值東鄉盜起一夕猝至俊母老扶
掖登山力乏不前母子俱爲所執賊欲殺母俊曰甯殺
我賊遂殺俊後有賊魁至罵曰辜秀才善人也何爲殺
之乃殺殺俊者而全其母

安志

余隆九樂安人司訓勝次子性篤孝時閩廣流寇破縣
執勝去隆九亟奔賊營乞命賊欲併殺之忽狂風揚塵
蔽日未幾雷雨大作賊曰此人能感天心未可加害父

子俱得釋

府志

祝永壽字望坪臨川人隆慶舉人知福甯州事精明寬
厚愛民禮士州城向皆蟄石傾欹可踰永壽爲請當道

易以瓢遂成堅堞歲當天造賦籍悉出手裁洞燭奸蔽

州民咸頌之

福建通志

鄒統臨川人知蓬州時巴中擾亂統外給軍餉內節民財勞苦萬狀逮賊平調去郡人追思之

四川通志

董裕字擴菴樂安人隆慶進士擢御史出按滇南奏免固原等路虛耗及礦課各數萬莽酋竊發撫臣出禦忽報賊奄至裕不動聲色料民分守募壯丁扼險設伏賊遁去忤中貴左遷起爲大理少卿以僉都御史提督鄖陽升南工部侍郎抗列勦裔怙寵不法狀晉刑部尚書予告卒贈太子太保有仁孝會旨及奏草行世

人物志

聶良杞字子實金谿人隆慶進士授衛輝令徵拜禮垣有清祀典斥異端諸疏出典演學置五華書院萃博士

弟子讀習其中士風丕變晉閩參辭弗赴歸田二十餘年手纂諸儒語錄弟良璧嘉靖進士子文麟萬厯進士

仕終參政

府志

胡桂芳字瑞芝金谿人萬厯進士司李杭州藩司以舊逋數萬委桂芳追理密條上請詔蠲之厯湖廣大參會有事於播奉檄偕督師李化龍治兵轉餉將軍劉綎李寅爭首功不相下桂芳爲條析功狀兩軍懽然遂以成功黔撫缺神宗特旨老成持重莫如胡某遂以副都御史撫黔旋以工部侍郎督河道卒諡忠端

人物志

詹事講字明甫樂安人萬厯進士爲御史上封事數十定王守仁陳獻章胡居仁從祀議按浙嵯已督學南北畿得人稱盛會星變力陳主德時政之失又疏列李材

破緬功李得輕宥公論壯之

人物志

鄒光弼臨川人知鍾祥縣中官監稅開礦其鋒甚烈光弼獨抗之或諷使少婉光弼慨然曰龍飛王氣宜完興都黎民當恤安敢以小吏顧望致吾民破死相屬乎稅璫陳奉杜茂衡之疏參逮治久之復起爲都水主事卒祀鄉賢著大學古本東謚放言

人物志

周孔教字懷魯臨川人萬厯進士爲御史差長蘆巡鹽按河南督直隸學政皆以風采著倭蹂朝鮮封貢議起孔教上言古之良臣折衝樽俎之間見事萬里之外今正使已竊逃矣隨行已被殺矣沈維敬已被縛矣乃尚書石星執迷不悟奉楊方亨片紙爲誓軀而按倭之不變封事之苟成何其愚乎今日倭情不封固變封亦變

惟有守朝鮮爲上策朝鮮失則遼陽危遼陽危則京師震矣後皆如其言晉同卿巡撫應天總理河道同籍卒

分省

人物考

湯顯祖字若士臨川人少善屬文有時名張居正欲其子及第羅海內名士以張之聞顯祖及沈懋學名命諸子延致顯祖謝弗往懋學遂與居正子嗣修偕及第顯祖至萬曆十一年始成進士授南京太常博士就遷禮部主事十八年帝以星變嚴責言官欺蔽並停俸一年顯祖上疏曰言官豈盡不肖蓋陛下威福之柄潛爲輔臣所竊故言官向背之情亦爲默移但知自結於執政所得爵祿直以爲執政與之縱他日不保身名而今日固已富貴矣陛下方責言官欺蔽而輔臣欺蔽自如失

今不治臣謂陛下可惜者四朝廷以爵祿植善類今直
爲私門蔓桃李是爵祿可惜也羣臣風靡罔識廉恥是
人才可惜也輔臣不越例予人富貴不見爲恩是成憲
可惜也陛下御天下二十年前十年之政張居正剛而
多欲以羣私人驚然壞之後十年之政申時行柔而多
欲以羣私人靡然壞之此聖政可惜也乞誠諭輔臣省
愆悔過帝怒謫徐聞典史稍遷遂昌知縣二十六年上
計京師投劾歸明年大計奪官家居二十年卒

明史

曾維倫字惇吾樂安人萬曆進士授黃州府推官時張
居正入朝楚中大吏皆奔走迎謁維倫稱疾不往日從
貫城訪劔江諸學與耿定力焦竑羅汝芳鄒元標郵筒
絡繹往來參訂直方之操益堅量遷嘉興府同知未強

仕休歸杜門講學至老不懈

人物志

周獻臣字欬六臨川人萬厯進士授太康令爲郡署免
歸年未四十也學博而思驚務鉤奇出險以遠俗士耳
目家置大甕數百鈔撰羣籍網羅古今異言奇事書成
名曰鴻乙通葉文忠向高在政府上其書入祕閣以修
史薦有旨報聞所撰有嶠嶠山人語林鸞林外編英巨
贖言人外脞史蔥函摭言數百卷

人物志

吳道南字會甫崇仁人萬厯己丑廷對第二人授編修
進中允直講東宮太子偶旁囑道南卽輟講拱竢太子
爲改容厯諭德少詹事晉禮部侍郎請追謚建文忠臣
拒朝鮮火謝志藥之請卻吐魯番貢玉其務持大體如
此父喪歸禪除卽家拜禮部尚書兼東閣大學士三疏

辭不允始入都請撤稅璫下章奏補藩臬釋繫囚時望頗屬之與言官相詆請告疏二十七上帝猶勉留會母喪乃得請作大政議二十條則道南絕筆也贈少保諡文恪著有日講錄巴山草曙谷集及奏議語錄諸書

明史

志安

吳仁度字繼疎悌子萬厯進士授中書舍人三王並封議起抗疏爭之久之擢吏部主事厯考功稽勳郎中趙邦清被劾疑同官鄧光祚等嗾言路憤激力辨章下考功仁度欲稍寬邦清罰給事中梁有年遂劾仁度黨比時光祚引疾去而仁度代爲文選御史康丕揚復劾仁度傾光祚而代之詔改調南京自邦清被論後言路訐不已都御史溫純恚甚請定國是以剖眾疑而深爲仁

度惜尋補南京刑部郎擢太僕少卿以僉都御史巡撫山西砥礪廉隅與魏允貞齊名居四年以疾歸熹宗初起大理卿進兵部右侍郎復稱疾去再起工部左侍郎天啟五年魏忠賢以仁度與趙南星楊漣等善勒令致仕尋卒

明史吳悌傳大理寺卿府志

謹案仁度起在光宗初

周曰庠字時化臨川人萬厯進士在諫垣首疏釋繫起

廢先後擊諸巨璫正

謹案正下謝志誤衍人字

代藩冒嫡之議督視

城工節金錢無算奉差便道歸省旋丁繼母艱哀如生

母服除升大理少卿卒著有三垣奏議文集雜藁

人物志

謝廷諒字友可金谿人萬厯進士南京刑部主事帝命李廷機入閣又召王錫爵廷諒言廷機才弱而閹錫爵氣高而揚均不宜用又曰儲君之立爲王也自錫爵始

舉人之有考察也自廷機始巡按之久任也自趙世卿始章疏之留中也自申時行始年例之不舉考察之下也自沈一貫始此皆亂人國者也疏入留中終順慶

知府

明史謝廷讚傳

謝廷讚字曰可廷諒弟萬厯進士未授官卽極論礦稅之害旋授刑部主事先是詔於二十八年春舉行冊立冠婚之禮將屆期廷讚上疏據易理以陳時事曰觀乾坤以明閤員之當補臺省之當選卽損益以明礦稅之當撤卽家人以明冠婚冊立之當速卽中孚以明詔令之當信末言皇上誠采納臣言卽罪臣出位斥逐臣禁錮臣臣擊壤邱壑有餘榮矣持疏文華門候命帝震怒褫職爲民是歲冊立之禮不行廷讚歸僑寓維揚授徒

自給久之卒天啟中贈尚寶卿

明史

章正岳字益孟臨川人萬歷進士爲杞縣令治河救荒
聲望大起以卓異徵爲吏部郎弟光岳字見前由進士
中書改吏部出爲山東參政歷太常通政至刑部左侍

郎

謝志謹案府志正岳昆弟三人
季宣岳負才不遇以副榜貢生終

何宗彥字君美其父由金谿客隨州遂家焉宗彥萬歷
進士累官禮部侍郎署部事六年清修有執遇事侃侃
敷奏時望甚隆旋乞假去御史左光斗等交章惜之光
宗立卽家拜禮部尚書兼東閣大學士天啟元年加少
師兼太子太師建極殿大學士四年卒官贈太傅諡文
毅弟宗聖工部右侍郎

明史

詹爾達字起鵬樂安人萬歷進士歷兵曹備兵湖南勦

武陵藍山之寇平四川蘭酋值鄒滕白蓮妖賊起改大名道擢光祿寺卿以糾劾魏璫閒住崇禎初以兵部侍郎起用辭終養不赴

人物志

易應昌字瑞芝臨川人萬歷進士授甌甯令擢御史巡漕督江北學政晉大理少卿忤璫削奪崇禎二年起左僉都御史進副都御史時京師有獄囚之變帝震怒下刑部尚書喬允升等於獄應昌請從寬擬上不可應昌曰法如是止矣臣不敢以一官易一命也三復執奏如初上愈怒遂并下應昌獄論死四年四月久旱求言多請緩刑乃免死戍邊福王時召復故官遷工部右侍郎國變後卒

明史喬允升傳人物志

李學閔字本仁臨川人從諸父致吾勿齋窮濂洛之學

萬厯己酉鄉舉爲國子監學正祭酒唐大章朔望必請

學閔升講座己率諸生聽講南雍稱爲盛事擢守泰州

革鹽稅築隄壩以杜水患禽窩藏海盜巨奸州民德之

左遷漢川令時寇蹂荆襄距縣僅再宿無城可守爲立

礮墩設柵架守禦有方賊不敢犯乃建議築城遂爲巖

邑病亟告歸吳楚皆祀名宦

府志 謹案臨川縣志 學閔父東成列儒林

朱欽相字如容臨川人萬厯進士由平湖令徵拜吏科

給事熹宗初封保媼客氏爲奉聖夫人欽相首疏極諫

媼佯求出以激上怒謫歸以薦起原官時八閩苦海寇

晉福建巡撫馳檄海上召渠帥面諭利害帥感泣歸命

忌者誣構逮問上察其廉介有素釋之

人物志

吳之甲字元秉臨川人萬厯進士督浙江學政淹雅好

奇以唐宋制科法拔俊英士雜詩賦詔誥試之文風自
是一變卒於官丰裁峻厲以經世大業自命不竟其用
人惜之有靜排集三十卷弟之仁癸丑進士爲御史有
聲終湖廣布政

人物志

邱兆麟字毛伯臨川人萬厯進士由行人擢御史崇禎
初卽家起爲河南巡撫始兆麟巡方時建天中書院以
崇德勸學去中州大猾數十人諸政畢飭尤盡心獄事
所閱審錄冊二千一百八十有奇所列矜疑開釋者二
百二十有奇至是兩河習其前政上下宜之加兵部侍
郎卒於任所著有樂餘園水暄亭玉書庭集六十餘卷

按豫仁言四卷

人物志

魏光國字合虛東鄉人父廷用知龍門縣創橋爲渡至

今稱魏公橋光國萬厯進士授行人風節自許應詔言
事語侵當軸廷推擬晉銓司忌者格之不報乞養歸著

有文竿兼古堂集

人物志

張瑀字慎軒臨川人萬厯舉人吉水教諭與鄒南皋以
德業相砥礪南皋推爲畏友得士如周瑞豹劉同升郭
之祥王宏劉渤皆先後成大名厯官刑部郎中出守肇
慶猺獠叛奉檄督勦三閱月悉平瑀功第一升甘肅兵
備副使致仕卒

府志

陳鍾盛字穉德文燧孫萬厯進士番禺知縣開祖訃非
嫡孫不應承重堅請守制歸服闋改教授升助教疏劾
魏璫建生祠太學前且侵御道非法璫敗擢禮部主事
教習駙馬公主已降府駙馬尚於門外日行叩頭禮三

年始就婚鍾盛抗疏言非會典儀注化源所係亟宜釐
正有旨如盛奏復言掌府內臣諸要挾狀拂璫意降調
旋補南兵部主事擢禮部郎中歷知登州皮島兵變謀
從登入海鍾盛預爲守禦備登保無恙升曹僕道卒府志
曾棟字隆吉臨川人萬歷進士由祠部郎升四川驛傳
道時土官董卜與高箕稱兵相攻撫臣請於朝以兵事
屬棟董卜嘗入貢朝議疑其鴛鴦將羈留之棟持議不
可引卜詣闕上疏得釋歸至是卜諭其眾曰是向嘗生
我者拒之不祥遂與高箕盟而還亂遂定以功屢晉布
政使子亨應自有傳

人物志

李大覺字覺之金谿人萬歷鄉舉知穀城兼署襄陽縣
張獻忠假軍符誑入襄陽城大覺聞變繫印於肘縊死

堂上

汾西通志卷二十三 撫州府

九

國朝賜諡節愍

明史張克儉傳

勝朝殉節諸臣錄

謹

弟大則萬歷舉人福建知縣擢四川道義通判留治建安大兵至偕長子上苑縊死並見縣志

祝萬齡金谿人寄籍陝西咸甯父世喬有至行以父遠遊不歸年十五卽獨身訪求瀕死歷數千里卒得之後由選貢通判南康以清慎著萬齡師事馮從吾萬歷進士累官保定知府天啟六年以忤璫落職崇禎初起黃州知府遷河南副使監軍磁州與山西監司王肇生合兵擊回賊六戰焚其巢賊平加右參政流賊自山西入河北掠新鄉萬齡邀擊之賊走陵川已復大至坐失事削籍歸久之廷臣交薦未及用西安陷萬齡深衣大帶趨至關中書院投繯死子諸生於宸從

國朝賜諡忠節

府志 勝朝 殉節諸臣錄

徐模字子範臨川人少以孝著事繼母極承順撫兄子無異視子天衢由大行晉銓司丙寅忤逆璫問住模大

笑曰使汝失身則辱莫大焉

安志

黃樸金谿人進士通判甯波渡海親覈昌國軍儲盡除宿弊復籍海舟什伍相保各有標驗奸萌肅清

浙江通志

鄒毓祚臨川人天啟進士令武陵逆璫構邑紳唐紹堯坐贓六千金毓祚爲捐俸勸施不足後考滿藩司以此靳之毓祚抗聲曰朝廷額供不及果當褫此乃勢璫私憾耳徵入西臺疏起竄逐諸臣又疏列閹黨孫雲鶴等罪狀語太迫切落職稍起至職方司郎中

府志

祝徵字文柔臨川人天啟進士巡按山西單騎行邊周

覽扼塞邏者執樵采人冒賞按實釋之邊人德焉平臺
召對條奏起廢進賢緩刑勤政等疏內艱歸時徽年已
高猶哀毀不自勝尋遘疾卒所著有言餘集及邊防京
儲鹽策等書

人物志

艾南英字千子東鄉人萬厯末場屋文腐爛南英深疾
之與同郡章世純羅萬藻陳際泰以興起斯文爲任乃
刻四人所作行世世人翕然歸之稱爲章羅陳艾天啟
四年南英始舉於鄉座主檢討丁乾學給事中郝土膏
發策詆魏忠賢南英對策亦有譏刺語忠賢怒削主考
籍南英亦停三科崇禎初年始詔許會試久之卒不第
而文日有名負氣凌物素所交亦多憚其口始王李之
學大行天下談古文者悉宗之後鍾譚出而一變至是

錢謙益負重名於詞林痛相糾駁南英和之於下排詆

王李不遺餘力南京繼覆江西郡縣盡失南英乃入閩

留居一載以疾卒於延平

白志謝志舊案南英究心史學爲古今全史千餘卷編

集甫竟遽罹兵火與他著述俱散佚

章世純字大力臨川人天啟舉人著有己未留書及章

子留書凡天文律厯以至五行禽遁陰陽星卜之言一

見卽能剖微摘謬授翰林孔目有旨召對以口吃辭條

上兵事極言禁旅邊鎮及召募客兵之弊出爲柳州知

府時年已七十矣聞京師變悲憤發疾卒於柳州

人物志

傅朝佑字右君臨川人有孝行舉鄉試第一師事鄒元

標天啟進士授中書舍人崇禎二年考選補兵科明年

八月疏劾首輔周延儒忤旨切責遷工科左給事中陳

當務十二事一納諫二恤民三擇相四勿以內批用輔
臣五勿使中官司彈劾六勿令法外加濫刑七止緹騎
八停內操九抑武臣驕玩十廣起廢十一敕有司修城
積粟十二講聖諭六條出封益藩事竣還里九年卽家
進刑科都給事中還朝愆期爲給事中陳啟新所劾貶
秩調外未行疏論溫體仁六大罪帝怒除名下吏按治
逾月體仁亦罷中官杜勳重朝佑令其上疏請罪而已
從中主之可復故職朝佑不應十一年冬國事益棘獲
罪者獄幾滿朝佑乃從獄中上疏爲請寬恤語過激廷
杖六十創重卒福王時復官

明史

謝德溥字培元東鄉人天啟進士選庶吉士授簡討以
省親歸杜門不出崇禎初召入晉侍讀纂修兩朝實錄

知制誥平臺記注編纂六曹章奏上御經筵德溥矩度
端嚴進止不失尺寸上目注之將特用矣時黨論繁興
德溥力求南爲國子祭酒假歸三晉宮階四預枚卜明
旨敦趣以母老具疏力辭通籍三十餘年前後立朝不
過五載澹於仕進知幾之哲有過人者母卒結廬深山
改號雲庵有雲庵等集

人物志

車夢瑤字玉符金谿人天啟進士歷任陝西副使駐涼
州涼爲河西極邊以軍功升湖廣按察使治兵辰州會
推河南巡撫命未下卒崇禎十三年察檄甘肅功特贈

三級賜銀綺卹其家

府志

劉先春字伯陽天啟進士由庶吉士改刑科給事中時
魏璫擅權在廷水火先春上疏謂諸臣不當以口舌事

君而人君不當更以耳目任人廷劾逆璫謂祖宗無法

天子無威幾蹈不測璫敗晉太常卿

府志

張斌字憲卿本姓姚臨川人金谿籍戊午鄉試第一乙

丑進士授大理評事擢禮部勳戚有聞河取利者立清

之皆斂戢不敢爭遷廣西蒼梧道卒官歸櫬日士民扶

服數百里不絕弟爛以庚辰特用賜同進士出身

府志

龔廷獻字鑑惺金谿人天啟進士授行人選御史璫敗

廷臣多毛舉細過互相彈擊廷獻疏言借題報復徒損

國體亦壞心術宜一切禁止出按時理枉辯冤尤以矜

恤爲事人稱長者自免歸

府志

孔大德字登小金谿人天啟丁卯鄉試第一南宮罷歸

杜門著述無儲粟意興豁如著史評十五卷易解八

卷秀野堂集聚園詩草十餘卷

人物志
府志

羅萬藻字文止臨川人天啟舉人與陳大士艾千子章大力主文章之柄者四十餘年海內稱爲四先生嘗憤邊事潰散著本守議數千言大略言今天下文武乖方內事殊適磨牙厲吻惟苞苴門戶之死守不移一體之中痛癢既不自知搔抑亦無其具惟有坐以共斃而已崇禎己卯倪元璐以賢良方正薦有旨特用不赴授上杭令唐藩時擢禮部主事艾南英卒哭而殯之數月亦卒所著有小千園集

人物志

王廷垣字潛服東鄉人天啟進士由庶吉士授編修直起居注編纂章奏常奉使頒詔冊封所至必問軍民疾苦山川扼塞還列疏入告上喜納之歷升庶子掌春坊

事會上欲布素郊祀疏言事天以實不以文且乖禮制語殊切直改祭酒晉禮部侍郎所著內外制及奏議有

留園集

人物志

鄒士楷字行之臨川人天啟進士由中書改兵科給事疏言行間將帥數行更調兵將不習以後不必會推許經略於本鎮慎擇酌量才品咨部題補庶相信既深所舉不負上嘉納之時國計日絀有言暫免各省直官入覲止令捐輸助餉者士楷抗議爭之謂見小利而忘大體何以風厲天下議遂寢自疏乞外補浙江按察副使

人物志

王肇對字銘新東鄉人天啟進士崇禎初拜御史所奏議皆關國家大計嘗曰居官必先分別公私人才消長

之關亦在吾輩力持之耳巡按江南遭疾卒

府志

鄒孕孝字恭甫臨川人天啟鄉薦性豪邁家徒壁立飲酒賦詩自若也困公車授蘄水教諭左良玉叛孕孝亟請民兵登陴縣令孔某望風迎降乃正衣冠坐明倫堂賊至挾之出罵曰生平所守惟文章節義豈從反賊邪遂遇害

國朝入祀忠義祠

府志 勝朝
殉節諸臣錄

陳際泰字大士臨川人父寓汀州生於其地家貧不能從師又無書時取旁舍兒書屏人竊誦從外兄所獲書經四角已漫滅且無句讀自以意識別之遂通其義十歲於外家藥籠中見詩經取而疾走父見之怒督往田則攜至田所踞高阜而哦遂畢身不忘久之返臨川與

艾南英輩以文名天下其爲文敏甚一日可二三十首
先後所作至萬首經生舉業之富無若際泰者崇禎三
年舉於鄉又四年成進士年六十有八矣除行人居四
年護故相蔡國用喪南行卒於道

明史艾南英傳謝志舊案際泰子孝威

孝逸並知名謹案孝威字興霸仕桂王爲太僕少卿卒於粵孝逸字少游甲申後棄諸生隱居著述年五十卒

湯開遠字伯用顯祖子崇禎舉人爲河南推官帝惡廷
臣玩愒持法過嚴開遠疏諫曰陛下臨御以來明罰敕
法小臣大臣禁獄者相繼見廷臣薦舉不當疑爲黨徇
惡廷臣執奏不移疑爲藐抗以策勵望諸臣戴罪者多
而不開以立功之路以詳慎責諸臣引罪者眾而不諒
其致誤之由望推諸臣以心待諸臣以禮諭中外法司

以平允帝怒摘其疏中語責令指實乃上奏曰時事孔棘諸臣有過可議亦有勞可準有罪可程亦有情可原今綜核太過懲創太深往往朝所爲繹辱擯棄不少愛惜之人而野以爲推重愾嘆不可少之人上與下異心朝與野異議欲天下治平不可得也蘇州僉事左應選任昌黎縣令率土著保孤城乃用小過卒以賊議事急則鉅萬可捐事平則錙銖必較向使昌黎不守同於遵永不知費朝廷幾許金錢安所得涓滴而問之給事中馬思理御史高倬值草場火發狂奔盡氣無救燎原此不過爲法受過耳更欲以他罪論則甚矣宣大巡按胡良機陛下知其諳練兩任巖疆尋因過誤褫革輿論惜之監兌主事吳澧宵旦河干經營漕事運弁稽違量行

責戒乃褫革之夫兵譁則爲兵易將將譁則爲武抑文
勇於譁而怯於鬪安用此驕兵驕將爲末復爲都御史
陳于庭易應昌申辨帝怒切責之河南流賊大熾開遠
監左良玉軍躬擐甲胄屢致克捷帝以天下用兵意頗
重武督撫失事多逮繫而大將率姑息開遠以爲偏復
上疏言文臣未必無才能乃有甯甘罷黜必不肯任不
敢任者以任亦罪不任亦罪不任之罪猶輕而任之罪
更重也又言行閒失事無日不議處議罪而於蕩寇安
民毫無少補則今日所少者豈非大公之賞罰哉帝得
奏大怒命削籍解京訊治河南人聞之若失慈母左良
玉偕將士七十餘人合奏乞留巡按金光辰亦備列其
功狀以告帝命釋還戴罪辦賊十年正月討平舞楊大

盜楊四論功擢按察僉事監安廬二郡軍是時賊大擾江北開遠數有功巡撫史可法薦其治行卓異進秩副使監軍如故十三年與總兵官黃得功等大破革裏眼諸賊賊遂乞降朝議將用爲河南巡撫竟以勞瘁卒官軍兵咸爲泣下贈太僕少卿

明史

周文煒字赤之金谿人生於大梁生平孤行己意屹立不移曰吾固坦然者也因自號坦然入南雍就選得暨陽簿謝官歸築室秦淮曰壯爲五洩遊人老作秦淮釣叟於願足矣子亮工別有傳

江南通志

陳其赤字石文

謝志誤父

崇仁人崇禎進士司理衢州歷西

安守撫綏有方時秦中寇氛方熾獨西安得免以副使備兵川中轄成都獻賊圍攻嬰城佐巡撫龍文光等固

守成都陷投百花潭死家人同殉者四十餘人惟長子存於家

國朝賜諡節愍

明史張繼孟傳勝朝殉節諸臣錄

人物

詹爾選字思吉樂安人崇禎進士擢御史閣臣錢士升以票擬忤旨引咎回籍爾選具疏申救且言悖祖訓十二事上大怒召府部科道同入武英殿面詰上聲色甚厲爾選從容對曰臣所言祖訓尚不止此因述列朝聖政四十餘條上屢改容起立左右閣臣皆戰慄爾選侃侃不少遜撓上怒甚指疏中權宜苟且四字罪以指斥無奏對體命錦衣提下爾選叩頭曰臣死不足惜皇上幸聽臣言事尚可爲卽不聽臣亦可留爲他日思帝愈怒罪且不測諸大臣力救乃削籍歸十五年有詔召還

未赴而都城陷福王立首起故官羣小憚其鯁直令補

外僚遂不出國變後卒

明史人物志

傅雲龍字蒸甫金谿人崇禎進士授中書京師戒嚴士

卒僵臥雨雪中雲龍上疏請更番城守又上勦敵圖幾

疏皆得旨累遷副使備兵台紹計禽海寇竺武貝學杜

等東陽許都倡亂於金華雲龍簡勁卒倍道進以除夕

抵城下襲敗之轉漳南道參政

府志既擢漳南參政累升太

僕寺卿仍分守漳南漳潰被執不屈死桂王贈兵部尚

書國朝賜諡節愍攻勝朝殉節諸臣錄福建督糧道

參議傳雲龍籍貫未詳大兵入漳死焉

黃配元字位兩樂安人崇禎進士令懷甯流寇焚掠江

北城守戒嚴皖城舊有余忠宣濠塹歲久湮沒配元銳

意修復又於濠外築牛馬牆繞以木柵以禦賊騎之衝

突具藺石以挫敵鋒六年之間逆賊震鄰卒不敢偪行
取授南兵科給事中特旨以都御史巡撫安慶厲兵馬
飭守禦上游屹然方聯絡楚豫以圖大舉丁內艱去而
江上不支矣皖人祀之名宦祠

人物志

傅占衡字平叔臨川人少有異稟涉獵諸家經目不忘
性淡泊恥事徵逐奉父山中謝絕一切著漢書摭言編
年國策臨川記三十卷湘帆堂集三十六卷

白志

陳晝字惟易金谿人讀書躬行其學尤邃於易謂程子
言易象變占備乎辭由辭以得意爲知易之大義而邵
朱或有異同也蔡虛齋至謂文王周公狹於邵子朱子
密於孔子語尤不倫作周易意十二卷循孔子之傳以
測文周之辭從文周之辭以測伏羲之卦庶幾得之又

著雜言百五十章別有易備易謀筮考諸書數十卷

白志

徐奮鵬字自溟臨川人講學授徒四方裘糧問業履填戶外嘗刪補毛詩朱傳著有古今治統二十卷辨俗十卷怡偲集十卷學者稱爲筆峒先生從子春溶有文名

進士

白志

李茹春字載陽臨川人崇禎進士知華亭縣賦重民疲布折白糧僉解者輒破家茹春派運有法盡革陋規歲大歉饑民聚眾劫巨室太守率兵往捕譁益甚茹春單

騎諭解民賴以安立祠水次祀之

白志

王士和字萬育

謝志誤玉

金谿人崇禎鄉舉南京旣覆避入

閩授吏部司務疏陳時政擢兵部主事未一月知延平府唐王走汀州留士和居守俄警報疊至召父老謂曰

吾雖一月郡守當與城存亡若等可速出毋使數萬生靈盡膏斧鑕眾泣士和亦泣退入內署謂其子宗翰曰吾一介書生數月而忝二千石安敢偷生從容正衣冠投繯死時軍帥憐宗翰欲授以官宗翰不受扶父櫬歸

國朝賜諡節愍

明史鄭爲虹傳人物志勝朝殉節諸臣錄

揭重熙字祝萬臨川人崇禎十年以五經登進士授福甯知州福王時擢吏部主事外艱歸用曾櫻薦以考功員外兼兵科給事中從傅冠辦湖東兵事瀘溪告警冠不能救重熙劾解冠任兵事遂皆委重熙復擢江西巡撫右僉都御史攻撫州不克而退桂王授重熙兵部尚書兼右副都御史總督江西兵召募萬餘人薄邵武敗還金聲桓死重熙入張自盛軍自盛敗沒重熙走百丈

磔就空營炊食被禽至建甯昂首受刃顏色不改

國朝賜諡忠烈

明史勝朝殉節諸臣錄

黎民安金谿人崇禎十四年獻賊破襄陽民安方爲遊擊見火起率所部千餘人搏戰矢盡被縛抗罵賊死

國朝賜諡烈愍

明史勝朝殉節諸臣錄

傅鼎銓字惟深

謝志誤源

臨川人崇禎進士授檢討李自成

陷京師鼎銓南還唐王時以知府銜赴贛州軍尋復故

官贛破退隱山中桂王命爲兵部侍郎兼侍讀學士至

廣信張邨爲守將所執繫南昌獄論降不從從容受刑

明史揭重熙傳

鄭夢眉金谿人崇禎舉人授四川南部令殫心撫字民

夷帖服張獻忠方肆屠掠又聞京師陷莊烈殉社稷北

向長跪再拜畢正衣冠投繯而絕合室死難十餘人部民聚哭爲立祠祀焉

國朝賜諡節愍

府志 勝朝
殉節諸臣錄

李國正字仲將臨川人由舉人知耒陽縣革解費陋規銀二千餘兩峒賊爲寇捐金募民兵三千人堅壁待之賊從間道遁去乃縱兵斬數百人生禽其渠自是賊不敢窺境丁艱歸復補順昌卒於官

府志

曾益字洪西臨川人以貢廷試特授兵部擢貴州安平道益子之璋之琦先死難撫州益慨然曰方今國亡主辱余家又何足卹孫可望寇安平集眾拒守城陷死之

國朝賜諡節愍

明史張耀傳
謹案謝志稱

府志

勝朝殉節諸臣錄
賊入黔者可望本獻忠

餘黨也

曾亨應字子嘉臨川人崇禎進士歷官吏部文選主事十五年秋詔起廢亨應以毛士龍李右讜喬可聘等十人上御史張懋爵劾其私遂謫去乙酉江西俱陷永甯王慈炎招連子峒士兵數萬復建昌入撫州寓書亨應亨應募兵數百與相犄角一日方宴客而大兵至遂被執并執其長子筠俱死宗族死者二十人部卒死者三百餘人弟和應奉父棟入閩又走肇慶聞兄死曰烈哉兄爲忠臣兄子爲孝子復何憾肇慶又失乃拜辭其父投井死先是棟弟棫棫兄益俱死難人稱曾氏五節始亨應爲懋爵所許人頗疑之後亨應死難而懋爵竟降闖賊爲直指使亨應

國朝賜諡烈愍和應入祀忠義祠

明史

白志

勝朝殉節諸臣錄 謹案府志

載亨應從子其能官石屏州聞甲申之變絕粒死

王政岐字體仁臨川人幼孤母楊苦節勤課領鄉薦授

鄱陽諭升陽朔知縣俗好屠牛歲輸官八百金曰牛胖

稅政岐禁私宰弗取其稅調臨桂縣里長例爲鹽商挽

舟灘峻水駛舟損責賠累死力請於上獲免通邑繪像

祀之

廣西通志

桂春陽臨川人善化尉下鄉催徵自備饗飧貧民許以

雞豚什物準值納賦秋毫無犯民甚德之

湖廣通志

曾栻字季子臨川人崇禎間由辟舉授蒲圻令時寇氛

交訐軍需旁午以息事甯人爲務刻意城埤訓練鄉勇

得勁卒三千人獻賊自陷省城後所至破竹咸留嘉魚

已設僞職棧獨傳檄討賊揚兵沙磧摧其前鋒月餘不敢偪城後單騎擊賊墜馬抗節死鄉民吳珊瘞之王墩廟側爲草蔴以泯其迹其子來蒲發冢縫斂面色如生事聞得贈卹

國朝賜諡烈愍

明史徐學顏傳 湖廣通志 勝朝殉節諸臣錄

周官字百度臨川人諸生崇禎間在粵西以兵部郎檄諸路召募城陷死之

國朝賜諡節愍

廣西通志 勝朝殉節諸臣錄

陳峻字景川樂安人三歲失母繼母虐之饑寒楚撻無所不極人以語其父父欲逐母峻時年十五號慟乞留父沒偕其妻承歡繼母無異所生母爲之感泣

安志

董宏學樂安人年十二母卒哭踊瀕死大父懼以慟天

糜之塾執書垂淚不瞬謂其師曰師無以兒書爲也吾
僅欲得長侍吾母師亦感泣母柩故停館側一夕三鼓
大雷雨忽聞嗚咽風雨聲相錯師心動曰得無某孺子
猶號母所亟視之從電光中見其兩手翼柩如晤語然
柩中似有應者亟護歸繼母凡六宏學事之皆如生母
最後母楊嘗病疫人無敢近獨宏學日夕與俱壬申流
寇肆掠宏學倉卒負母去賊見其四壁所列皆聖賢格
言家獨免於燬安志謝志舊案安志孝義傳同邑尚
有陳發張正綱詹德器張興純曾希和
曾筠金谿黎人瑞江華全大成臨川張大冠李伯美黃
作龔以成吳二崇仁聶罐黃二嚴東鄉吳安邦吳大行
附錄
於此

曾醇化字穆士金谿人崇禎舉人六合知縣大兵定
江南下令薙髮挺身詣帥請以身代民死帥欲降之不

可遂殺之而籍其家六合人哀金贖其尸妾王氏遺腹生一子六合人謂蒙天不斬仁人之後名之曰蒙約市貨出入私權一錢以贍其子號曾家稅蒙後易名必光

國朝康熙順天舉人醇化入祀忠義祠

府志

楊迺武字季審金谿人諸生甲申聞變慟哭南都陷艾南英招之赴閩以母老不果王得仁兵克撫州奉母入山行稍後與其女顏玉被執得仁令納女薙髮不可遂遇害女亦殉焉

府志

李芳春字寶秋金谿人副貢生丙戌從亡肇慶受桂王官王入緬芳春未及從不得已歸里及聞桂王遭難慟

哭書絕命詩於所服葛衫投繯死

府志

志明季尚有靖安守

備陳昌猷廩監生劉應欽諸生陳懷忠陳吉劉調鼎偕妻李氏陳良盛皆死寇難

徐應芳臨川人臨清州判官崇禎十五年 大兵圍城

同總兵劉源清等力拒數日援不至城破死之明史張振秀傳

徐日泰金谿人崇禎鄉舉官偃師知縣十三年李自成

攻城一日而陷大罵不屈為賊轢割死

國朝賜諡烈愍明史武大烈傳 勝朝殉節諸臣錄 譚至全家殉之大兵

譚聖言臨川人官唐縣主簿崇禎末流寇破城被執不

屈死

國朝入祀忠義祠勝朝殉節諸臣錄

張世溶字水心臨川人少負文章盛名崇禎丁丑成進

士年六十矣除遂安令秩滿以卓異擬試御史時有旨

行取官必再歷邊俸復補蠡縣招徠殘民措置兵餉畿

北隱然長城復召考選有兵科之命未入垣都城破陷

賊不屈死

府志

袁自新字先修臨川人意氣豪邁偉儀表少孤嗜學博通經史年十九游學廣東以程鄉籍中崇禎癸酉武鄉試丁丑成進士歷官贛州長甯都司操守清嚴善撫士卒與同甘苦以是人樂爲死長甯地連閩楚控制嶺南屢勦山賊有功升閩粵要路參將福王卽位自新留鎮長甯乙酉大兵定贛州徇下諸縣自新練兵抗拒攻之浹旬自新憂憤卒城遂潰四子一女俱死於兵

府志

江西通志卷一百五十三